

# Fung Cinq Laiz Hawj Dij Goanz Ndaw Loahmax Chaenh Naeh

## Laemh Daihlai Dix Naeh

Bauxloah daz mwz lez zauqhoiq Loahmax, dix zoq laiz fung cinq naeh hawj paenqdix. Bauxloah daz daj puj Loahmax sowh puj sinq Zaeuj naeh zaemh yuq ndauj ux, yaq hawj paenqdix aeu ngaenzjenz saeh dix, dix gvaq mwz ndaw Cizbanzyah. Gaenq zungqyauq nyeuz naeh zawh, laemh zwz naeh ndaw zauqhoiq Loahmax, puj Yaeuhtaiq sowh puj sinq Zaeuj naeh daj puj yowngh ndai sowh puj sinq Zaeuj naeh nwh kauqfaengz nwh mboq dungzkaeuj. Bauxloah ngwz tungzgoaq laemh kauqfaengz hoakzaqrawz hax, hawj paenqdix mboq rux dungzjinj, dungzdix.

## Gawz Laiz Cinq Hawj Gawz

**1**<sup>1</sup> Gux zawh Bauxloah, puj koj Jizduz Yeysuz, dij Sen lowg gux hoak dij goanz zawxkauq Yeysuz, zoanzmaenh nemz gux bae koanx kauqfaengz dij Sen.<sup>2</sup> Sowh kauqfaengz gux koanx naeh zawh zwzndowj dij Sen ndaej yinq dij goanz, zawh dix hawj puj zawxkauq dix laiz nyaengx ndaw sw dix.<sup>3-4</sup> Sowh kauqfaengz gux koanx naeh zawh laemh lug zaiz dix, Zaeuj raeuz Yeysuz Jizduz. Yeysuz nganq boajnowx dij goanz dix maz hax, dix zawh luglan Daqvaeq. Nganq Minghkoan dij Sen maz hax, dix tai yaq daeuq zaeu, dij Sen hoakzaqnaeh hawj raeuz ruxndeq dix zawh lug zaiz dij Sen singjringh, dix miz riangz dwx taeuq.<sup>a</sup><sup>5</sup> Dij Sen yuq ndaw Yeysuz Jizduz yumq doiq piu ndae, hawj piu hoak dij goanz zawxkauq Yeysuz, hawj piu cho zwh dix bae lingz dij goanz dihdin puj gaeng gojmbaeuq maz sinq dix, hawj paenqdix

cholaeng sinq dix zoq biak kauq dix.<sup>6</sup> Gaenqsu sowh dij goanz dij Sen rongx maz hoak dij goanz Yeysuz Jizduz naeh goj zawh sowh dij goanz dix nemz gux bae lingz naeh.<sup>7</sup> Gux laiz cinq hawj paenq Loahmax chaenh su, su zawh sowh dij goanz dij Sen ngaiq yaq rongx maz hoak dij goanz dix naeh. Ngwz Dez ndaw fax raeuz, dij Sen, daj Zaeuj raeuz, Yeysuz Jizduz gumx su, hawj su yuqvangq.

## Bauxloah Ngwz Bae Loahmax Taeuq

<sup>8</sup> Hawj gux daeh hax gaemz ux daekgoanq! Gux maengx Yeysuz Jizduz how daengzle gaenqsu mbaiq dij Sen gux. Unj gaenqsu sinq dij Sen baenzaqnaeh, dij goanz ijrawz goj ruxndeq.<sup>9-10</sup> Gux daj dij Sen hax kauq kwnzkwnz laemh zoah su. Gux zawx taen gaenqsu ndowj taeuq eh, gux goq vanz vanz dix, ngwz dix goj faengz hawj gux bae taen su. Dij Sen gux aeu zaw kvej naeh, gux koanx kauqfaengz lug zaiz dix naeh ruxndeq gaenq gux hax naeh

---

<sup>a</sup>**1:3-4** Gaemz kauq naeh goj inj rux zawh hax: *Nganq Minghkoan dij Sen maz hax, dix tai yaq daeuq zaeu, dij Sen rongx dix hoak lug zaiz dij Sen miz riangz dwx taeuq naeh.*

zawh zaeh. <sup>11</sup> Gux zawx taen su taeuq, zawx aeu sowh gaenq ndae minghkoan dij Sen yumq aeu hawj naeh baen hawj su, hawj su daeq ka loh dix mwz naj. <sup>12</sup> Zoq zawh hax, gux leztaen gaenqsu mizzaw sinq dij Sen, gaenqsu zoq hawj ndaw zaw gux ndaej byongz taeuq; gaenqsu leztaen gux mizzaw sinq dij Sen, gux goj hawj ndaw zaw su ndaej byongz taeuq. <sup>13</sup> Daengzle bihnongx aj, gaenqsu ruxndeq zuxbaenz, gux haeuz soanx bae zawj su jijgaj mbaed, gux bae zawj su zawh lingz dij goanz caqsiq daeq ka loh Zaeuj, hoakzaq yuq dih puj yowngh ndai dihndai naeh, gaj taengdiak gannaeh naengz miz yowngh daet, bae mboq baenz. <sup>14</sup> Puj rux tasw<sup>b</sup> gojndae, puj mboq rux tasw gojndae, puj gvai gojndae, puj uaj gojndae, gux baenz aeu kauqfaengz koanx dwk paenqdix, jixmboqzawh gux zoq zawh baznij paenqdix. <sup>15</sup> Baenzzaqnaeh, gux zawx aeu kauqfaengz koanx dwk su taeuq, sowh dij goanz yuq ndaw Loahmax chaenh naeh aj.

### **Kauqfaengz Zawh Doakriangz Dwax Dij Sen**

<sup>16</sup> Gux mboq aeu kauqfaengz dij Sen hoak gaenq laizlom! Baenzzaqrawz mah? Sowh kauqfaengz naeh zawh doakriangz dwax dij Sen, zawh aeu jeuq sowh dij goanz sinq naeh, zawh aeu hawj puj Yaeuhtaiq daekgoanq, yaq taeng puj yowngh ndai.<sup>c</sup> <sup>17</sup> Sowh kauqfaengz naeh hawj dij goanz ruxndeq dij Sen hoakzaqrawz hawj dij goanz byenqbaenz sowh

goanz gaemz hax mboq miz naeh, hawj dij goanz ruxndeq byenqbaenz sowh goanz gaemz hax mboq miz naeh zwz rawz goj zawh cholaeng ciangzsinq. Daj ndaw *Sw Dij Sen* hax naeh dungzlumj: "Sowh goanz gaemz hax mboq miz naeh cholaeng paenqdix sinq ej ndaej aen mingh."<sup>d</sup>

### **Dij Goanz Mboq Yinq Dij Sen Hoak Dij Sen**

<sup>18</sup> Dij Sen hawj dij goanz raeuz ruxndeq dix yuq ndaw fax rik daeuj doq sowh dij goanz hoak loang dix, sowh dij goanz hoak gaenqndog naeh, zoq zawh rik daeuj doq sowh dij goanz hoak gaenqndog hawj daenh mboq ruxndeq kauqjing dij Sen naeh. <sup>19</sup> Dij Sen haeuz hawj dij goanz ruxndeq dix baenzzaqrawz, baenzzaqnaeh laemh taeng gaenq dij Sen, gaenq rawz ruxndeq baenz dij goanz haeuz bwnz ruxndeq singjringh. <sup>20</sup> Daeq chauq fax daj dihndin maz, daengz dij goanz lez mboq taen dij Sen baenzzaqrawz, gaj chungh sowh gaenq dix chauq naeh raeuz ruxndeq dix riangz daengznauq, dix zoq zawh dij Sen singjringh, daj yowngh ndai mboq dungzlumj. Dij goanz gawz hax mboq ruxndeq le gaenqnaeh goj hax mboq baenz. <sup>21</sup> Dij goanz rux lej ruxndeq dij Sen, gaj dij goanz mboq aeu dix hoak dij Sen biangz dix, goj mboq mbaiq dix. Ndaw zaw paenqdix nwh gaeng goj zoq mboq miz luq, gaenq dij Sen ndaw zaw paenqdix mij taeuq, nwh gaenq mbowq baenzlwnx. <sup>22</sup> Paenqdix hax hoakri

<sup>b</sup>1:14 Inxnaeh bwnz aeu kauq Cizlah laiz naeh zawh hax: *Puj Cizlah*. Inxnaeh *puj Cizlah* zoq zawh hax sowh dij goanz rux lez tasw Cizlah naeh. Bauxloah zawh aeu tasw Cizlah laiz bwnz sw naeh.

<sup>c</sup>1:16 Inxnaeh bwnz aeu kauq Cizlah laiz naeh zawh hax: *puj Cizlah*. Inxnaeh *puj Cizlah* zoq zawh hax sowh dij goanz mboq zawh puj Yaeuhtaiq gaj rux lez tasw Cizlah naeh.

<sup>d</sup>1:17 Suq kauq naeh haeuz yuq ndaw *Sw Hazbazguh* 2:4.

gvai zawzmbokraeuh, gaj paenqdix gaj laeng gaj uaj, <sup>23</sup> naengz gajfa aeu sowh gaenq rux tai naeh dang dij Sen mboq rux tai dij Sen miz najta naeh, chauq rangh dij goanz loaj, rangh dij noag loaj, rangh do'bo loaj, rangh do rux zanz loaj, gvih le gaenqnaeh.

<sup>24</sup> Dij goanz hoakzaqnaeh, dij Sen zoq jizzaz paenqdix bae hoak sowh saeh oangjangj ndaw zaw paenqdix ceu hoak naeh, yaq paenqdix zoq goanz lej aeu ndang goanz hoak gaenq mboq jihzaq. <sup>25</sup> Sowh gaenq laemh dij Sen zaeh naeh, paenqdix mboq sinq, naengz gajfa bae sinq sowh gaenq daenh mbyaep naeh; paenqdix mboq yinq Zaeuj chauq daengzle naeh zawh dij Sen, naengz gajfa bae aeu sowh gaenq Zaeuj chauq naeh hoak dij sen, kvej le gaenqnaeh. Gaj raeuz ruxndeq Zaeuj chauq daengzle naeh hoj biangz daengznauq! *Azmaenh!*

<sup>26</sup> Dij goanz hoakzaqnaeh, dij Sen zoq jizzaz ndaw zaw paenqdix ceu hoak sowh saeh oangjangj naeh. Puj nyingz bejdx taeuq, puj nyingz haeggaj daj puj nyingz zaemh yuq hoak sowh saeh oangjangj naeh. <sup>27</sup> Puj zaiz goj dungzlumj, bejdx taeuq, mboq daj puj nyingz zaemh yuq, puj zaiz daj puj zaiz haeggaj dungzceu, nwh niakniak, hoak sowh saeh oangjangj naeh. Paenqdix hoak sowh saeh oangjangj naeh, ndang paenqdix zoq zoah yah, dij Sen hawj paenqdix haeggaj gaux tin dip to'mehdin hoakri. <sup>28</sup> Paenqdix dajndij mboq yinq dij Sen, dij Sen zoq jizzaz zaw paenqdix nwh gaenqndog, hoak sowh gaenq mboq hoj hoak naeh. <sup>29</sup> Paenqdix ndog zaehzaeh, puj baenzaqrawz goj miz, mbowq aj, maeux aj, duh taeuq aj, ta'ndaem daenh aj, dungzkaj-dungzlingz aj, dungzjeng aj, yai daenh aj, ngwz gaj daenh mboq ndae aj, laemhkoan daenh aj, <sup>30</sup> moakndai daenh

aj, hwnq dij Sen aj, qiz puj ndai aj, baegbongz aj, haeggaj hax hoakri haen zawzmbokraeuh aj, nwh gaj hoakrawz hoak gaenq mbowq tem aj, fanj bohmeah aj, <sup>31</sup> ndaw zaw mij taeuq aj, hax rawz mboq hoak rawz aj, mboq nwh daenh aj, mboq zawchaej daenh aj. <sup>32</sup> Hax lej hax paenqdix ruxndeq gawz hoak sowh saeh naeh dij Sen zoq panq gawz hoj tai, gaj paenqdix mboq zawh gaj hoakri paenqdix bae hoak, daenh bae hoak paenqdix goj hax hoj.

### Dij Sen Mboq Howj Gawz Nyeuz

**2** <sup>1</sup> Sowh dij goanz pyaemj daenh naeh, gaenqmawz ah! Mawz pyaemj daenh gaenqnaeh gaenqnaeh, gaj hoakri mawz goj hoak gaenqnaeh gaenqnaeh. Mawz pyaemj daenh, mawz goj zawh pyaemj hoakri naeujngaz! Baenzaqnaeh jixzawh gaenqmawz pyaemj daenh, daengz mawz zawh gawz, sowh gaenq mawz hoak loang naeh mawz goj dih aeu ngej bae rawz mboq miz. <sup>2</sup> Gaenqraeuz ruxndeq, gawz hoak loang, dij Sen toj rux saenxpanq mboqyaq. Dix saenxpanq dij goanz zawh hohdih. <sup>3</sup> Mawz naeh ah! Mawz pyaemj daenh gaenqnaeh gaenqnaeh, gaj hoakri mawz goj daj daenh dungzlumj hoak gaenqnaeh gaenqnaeh, mawz faeklah mawz rux gowx gvaq dij Sen saenxpanq maj? <sup>4</sup> Dij Sen doiq mawz zawkau taeuq, dix yangq mawz, dix gaemx mawz ndowj taeuq, gaj mawz aeu nyaengxzaw mbyah? Mawz mboq ruxndeq dix doiq mawz ndae zawh lingz mawz gaix maj? <sup>5</sup> Zaw mawz haxnyaeb, mboq venq gaix, hawj dij Sen gaj laeng gaj rikdwk mawz lai. Vaenz dij Sen rik dwk chaenxfah dij goanz naeh, dix

hawj daengzle leztaen dix saenxpanq piang yaengh piang, taeng vaenz naeh mawz zoah naek mboqyaq.

<sup>6</sup>Gannaeh gawz hoakzawz hoak, vaenz gaengnaeh dij Sen zoq hoakzawz doiq dix.

<sup>7</sup>Gawz ceu sowh najta dij Sen aeu hawj naeh, ceu hawj dij Sen haenh, ceu sowh gaengq miz daengznauq naeh, yaq cho le gaengnaeh kaem'zaw hoak saeh ndae mwznaj, dij Sen zoq aeu aen mingh daengznauq naeh hawj dix. <sup>8</sup>Gaj sowh dij goanz

nwh gaj gaengq hoakri, sowh dij goanz mboq biak kauq jing dij Sen, gajfa biak kauq ndog naeh, dij Sen toj rikdwk paenqdix, chaenxfah paenqdix mboqyaq. <sup>9</sup>Dix hawj sowh dij goanz hoak mboq naeh miz aen nanq, yuqraix. Zawh puj Yaeuhtaiq daekgoanq, yaq taeng dij goanz puj yowngh ndai.<sup>c</sup>

<sup>10</sup>Gaj dix haenh sowh dij goanz hoak saeh ndae naeh, hawj paenqdix miz najta, hawj paenqdix ndaej yuqvangq, zawh puj Yaeuhtaiq daekgoanq, yaq taeng dij goanz puj yowngh ndai. <sup>11</sup>Dij Sen mboq rux howj gawz nyeuz.

<sup>12–13</sup>Baenzaqrawz hax dij Sen mboq rux howj gawz nyeuz mah? Yuq doqnaj dij Sen, mboq zawh hax ndaej biak nyinz fahlih dij Sen ej zawh sowh goanz gaemz hax mboq miz naeh, sowh puj hoak sowh gaengq fahlih dij Sen yaix hoak naeh zux ndaej hoak sowh goanz gaemz hax mboq miz naeh. Baenzaqnaeh, sowh puj mboq ndaej biak nyinz fahlih dij Sen naeh, paenqdix hoak loang paenqdix rux zoah lown, gaj mboq zawh lown dawj fahlih dij Sen. Sowh puj ndaej biak nyinz fahlih dij Sen naeh, paenqdix hoak loang paenqdix zoq rux zoah aeu fahlih dij Sen saenxpanq. <sup>14</sup>Sowh dij goanz mboq

zawh puj Yaeuhtaiq naeh daengz paenqdix mboq miz fahlih dij Sen, gaj jixzawh paenqdix nganq sowh gaengq hoakri nwh naeh, hoak sowh saeh fahlih dij Sen yaix hoak naeh, zaw paenqdix zoq zawh fahlih hoakri, paenqdix zoq daj miz fahlih dungzlumj.

<sup>15</sup>Sowh gaengq paenqdix hoak naeh, ndaw zaw paenqdix ruxndeq gaengq rawz hoj, gaengqrawz mboq hoj, chungh le gaengq naeh zoq ruxndeq ndaw zaw paenqdix miz fahlih. <sup>16</sup>Vaenz saenxpanq naeh, dij Sen hoakzawz sowh kauqfaengz gux laemh naeh hawj Yezsuz Jizduz saenxpanq daengzle sowh gaengq ndaw zaw dij goanz nwh naeh daj sowh gaengq dij goanz hoak naeh, daengz daenh mboq ruxndeq paenqdix ndaej nwh gaeng, ndaej hoak gaeng, dij Sen goj naengz saenxpanq.

### **Ndaw Zaw Hoak Puj Yaeuhtaiq Zux Zawh Puj Yaeuhtaiq Zaeh**

<sup>17</sup>Gux daj puj Yaeuhtaiq hax, mawz hoak goanz puj Yaeuhtaiq ux, mawz hax mawz maengx fahlih, mawz hax mawz ndaej hoak dij goanz dij Sen zoq miz naj nyeuz daenh. <sup>18</sup>Mawz hax mawz ndaej biak fahlih zau, baenzaqnaeh mawz ruxndeq hoakzawz hoak kaeujzaw dij Sen, goj ruxndeq gaengqrawz hoj gaengqrawz mboq hoj. <sup>19</sup>Mawz hax hoakri zawh puj lingz loh, lingz loh puj ta'mbud, mawz hax hoakri zawh gaengqrungh, yangz sowh dij goanz yuq dih ndaem naeh. <sup>20</sup>Mawz chungh ndaw fahlih ruxndeq gaengq dij Sen daj ruxndeq kauq jing dij Sen, mawz hax mawz zawh swzfuz puj uaj, zawh lauxswz engliak. <sup>21</sup>Mawz zau daenh, mawz mboq zau hoakri maj? Mawz koanx dwk daenh

---

<sup>c</sup>2:9 Inxnaeh ndaw sw hax: *puj Cizlah*. Inxnaeh *puj Cizlah* zoq zawh hax sowh dij goanz mboq zawh puj Yaeuhtaiq naeh.

mboq jinx hoaklaek, gaj hoakri mawz ej hoaklaek maj? <sup>22</sup> Mawz hax hoak po hoak mez mboq jinx naengh puj ndai, gaj hoakri mawz ej bae naengh puj ndai maj? Mawz ywjhwnq sowh gaenq daenh aeu hoak dij sen mbud naeh, gaj hoakri mawz ej mwz laek sowh za'hoq ndaw meuh naeh maj? <sup>23</sup> Mawz aeu fahliah hoak gaenq miznaj, gaj hoakri mawz ej mboq biak fahliah, hoak loang fahliah hawj daenh lezmboqqix dij Sen maj? <sup>24</sup> Daj ndaw *Sw Dij Sen* hax naeh dungzlumj: "Cholaeng gaenqsu, puj yowngh ndai hax dij Sen, luanqhax-luanqbae."\*

<sup>25</sup> Jixzawh mawz biak fahliah bae hoak, mawz hoak diauq zauh heh naeh doiq mawz zoq miz luq. Gaj jixzawh mawz mboq biak fahliah bae hoak, mawz hoak diauq zauh heh naeh doiq mawz zoq mboq miz gaeng luq. <sup>26</sup> Baenzaqnaeh, jixzawh goanz ux dix mboq hoak diauq zauh heh naeh, gaj dix biak sowh gaenq fahliah yaix naeh bae hoak, daengz dix mboq hoak diauq zauh heh naeh, goj suanq dix haeuz hoak diauq zauh heh naeh haeuz zawh puj Yaeuhtaiq, zoq zawh hax, suanq dix zawh sowh dij goanz dij Sen lowg hoak dij goanz dix naeh. <sup>27</sup> Dix mboq hoak diauq zauh heh naeh gaj dix biak fahliah bae hoak, mwznaj dix gauq mawz, unj mawz hoak diauq zauh heh naeh daj miz sowh fahliah laiz nyaengx ndaw sw naeh, gaj mawz mboq biak fahliah. <sup>28</sup> Gux haxdoq mawz, goanz ux zawh mboq zawh puj Yaeuhtaiq mboq zawh lez baihnog, heh mboq heh goj mboq zawh lez boajnowx. <sup>29</sup> Mizgaj sowh dij goanz ndaw zaw hoak puj Yaeuhtaiq naeh zux zawh puj Yaeuhtaiq zaeh. Goj mizgaj sowh dij goanz ndaw zaw hoak diauq zauh heh naeh zux zawh

hoak diauq zauh heh naeh zaeh. Sowh dij goanz naeh zawh maengx Minghkoan dij Sen, mboq zawh maengx sowh fahliah laiz nyaengx ndaw sw naeh. Sowh dij goanz naeh ndaej haenh, gaj mboq zawh dij goanz haenh dix, zawh dij Sen haenh dix.

**3** <sup>1</sup> Hoakzaqnaeh lez maz, puj Yaeuhtaiq ijrawz ndae nyeuz puj yowngh ndai nix? Hoak diauq zauh heh naeh miz gaeng luq nix? <sup>2</sup> Hoak puj Yaeuhtaiq miz gaenq ndae lai taeuq. Towhbeh zawh gaenq naeh, zoq zawh dij Sen haeuz aeu kauq dix hawj puj Yaeuhtaiq zauzhuz. <sup>3</sup> Gaj jixzawh puj Yaeuhtaiq miz goanz mboq sinq kauq dij Sen nix? Paenqdix mboq sinq dij Sen ej rux hawj dij Sen mboq hoak sowh gaenq dij Sen ndaej hax naeh maj? <sup>4</sup> Mboq rux daengzhwx! Daengz dij goanz gaj goanz gaj haxyai nauq, dij Sen goj naengz hoak sowh gaenq dix ndaej hax naeh. Daj ndaw *Sw Dij Sen* hax naeh dungzlumj, ndaw *Sw Dij Sen* hax:

"Zaeuj aj, daenh toj ruxndeq kauq mawz hax  
gaeng zawh hax zaehzaeh mboqyaq;  
mawz zoah gauq gaurawz mawz toj bex  
mboqyaq."\*

<sup>5</sup> Miz dij goanz hoakzaqnaeh hax: "Gaenqpiu hoak mboq hoj, rux hawj daenh gajfa ruxndeq dij Sen hoak hoj nauq nauq, baenzaeh dij Sen mboq hoj rikdwk chaenxfah gaenqpiu, jixzawh dij Sen chaenxfah gaenqpiu, zawh dix mboq hoj ejloah."

<sup>6</sup> Gaj gux haxdoq su, mboq rux zawh daengzhwx! Jixzawh zawh dij Sen mboq hoj, dix hoakzawz saenxpanq daengzle baenz mux? <sup>7</sup> Goj miz dij goanz

\*2:24 Yixcizjeh 36:22. \*3:4 Lownx 51:4.

hoakzaqnaeh hax: "Cholaeng gaenqpiu hax kauq zaj, daenh ej gajfa ruxndeq kauq dij Sen zawh zaeh singj nyeuz, dij Sen gajfa miz najta, baenznaeh dij Sen mboq hoj aeu gaenqpiu hoak puj hoak loang maz saenxpanq." <sup>8</sup> Gaenqsu naeh ah, gangzmaz su sem hoakzaqnaeh hax ndeh: "Gaenqpiu hoak gaenq mbowq, hawj gaenq ndae gajfa miz lai." Gux daj gaenqsu hax, miz dij goanz hoakzaqnaeh moakndai piu zaeh, hax piu ndaej hax gaemz naeh. Sowh dij goanz naeh zoah saenxpanq zawh hohdih.

### Gawz Goj Zawh Puj Hoakloang

<sup>9</sup> Haenx, puj Yaeuhtaiq raeuz ndae nyeuz puj yowngh ndai maj? Mboq rux zawh daengzhwx! Gaenqraeuz haeuz laemh yaq, puj Yaeuhtaiq gojndae, puj yowngh ndai gojndae, gawz goj miz gaenq ndog rangh ndang. <sup>10</sup> Daj ndaw *Sw Dij Sen* hax naeh dungzlumj:

"Mboq miz goanz gawz zawh sowh goanz gaemz hax mboq miz naeh, daengz goanz ux naengz mboq miz,

<sup>11</sup> mboq miz gawz miz aen gvai, mboq miz gawz taeuq dij Sen.

<sup>12</sup> Gawz goj pit ka loh dij Sen, daengzle byenqbaenz gaenqndog.

Mboq miz gawz hoak saeh ndae, daengz goanz ux naengz mboq miz.

<sup>13</sup> Sowh kauq daeq hazzoh paenqdix chung maz naeh rux hawj daenh mboq saw, daj sowh mohbujreuh aj vaedvaed naeh dungzlumj,

sowh kauq daeq linx paenqdix maz naeh zawh gaj kauq goix gangq,

sowh kauq daeq baeg paenqdix og maz naeh miz duh dij nguz.

<sup>14</sup> Daengz baeg daem gaj sowh kauq mang daenh naeh daj duh.

<sup>15</sup> Kaj dij goanz, mbaedyamq paenqdix kvaik taeuq.

<sup>16</sup> Paenqdix bae taeng rawz, ijrawz zoq vaih, ijrawz zoq dohbaeuh.

<sup>17</sup> Paenqdix mboq sanz daeq ka loh hawj yuqvangq naeh.

<sup>18</sup> Paenqdix dit rawz daengz mboq ruxndeq mbu dij Sen."\*

<sup>19</sup> Gaenqraeuz ruxndeq, sowh kauq ndaw fahliah hax naeh zawh daj sowh dij goanz zoah fahliah gvanx naeh hax, hoakzaqnaeh hawj dij goanz dihndin gawz goj biak dij Sen saenxpanq, doiq gaenq hoakloang hoakri gaemz goak mboq miz. <sup>20</sup> Fahliah gozloz zawh hawj dij goanz ruxndeq hoakri hoak loang gaeng naeuj. Baenzaqnaeh, mboq miz gawz cho'mbaiq biak fahliah ndaej yuq ndaw zaw dij Sen hoak sowh goanz gaemz hax mboq miz naeh.

### Hoakrawz Zux Byenqbaenz Sowh Goanz Gaemz Hax Mboq Miz Naeh

<sup>21</sup> Gaj gannaeh, dij Sen haeuz aj ka loh ux hawj dij goanz ruxndeq, hawj sowh puj daeq ka loh naeh ndaej hoak sowh goanz gaemz hax mboq miz naeh. Ka loh naeh *Sw Fahliah* dij Sen daj

\*3:18 Lownx 5:9; 14:1-3; 36:1; 140:3.

daengzle sw puj zawxkauq dij Sen haeuz laemh zoah yaq. Ka loh naeh daj biak mboq biak fahlih dij Sen mboq miz gaeng. <sup>22</sup>Dij Sen hax gawz zawh sowh dij goanz gaemz hax mboq miz naeh, zawh cholaeng paenqdix sinq Yezsuz Jizduz, gawz goj zawh dungzlumj, zawh cholaeng sinq Yezsuz Jizduz zux byenqbaenz sowh goanz gaemz hax mboq miz naeh. <sup>23</sup>Baenzaqrawz hoakzaqnaeh hax mah? Dij goanz gawz goj hoak loang, hawj hoakri mboq miz sowh najta dij Sen aeu hawj naeh. <sup>24</sup>Gaj gannaeh dij Sen yumq doiq paenqdix ndae: hawj Jizduz Yezsuz taeq paenqdix dauh maz, yumq hawj paenqdix byenqbaenz sowh goanz gaemz hax mboq miz naeh. <sup>25–26</sup>Koax daekgoanq, dij Sen goq gaemx gaemx, mboq daem nij sowh gaenq dij goanz hoak loang naeh. Gaj taeng zwz maz, dij Sen zoq hawj Yezsuz yuq doqnaj goanzlai tai, hawj Yezsuz hoak sowh gaenq mbud daeb gaenq hoakloang sowh puj sinq Yezsuz naeh. Dij Sen hoakzaqnaeh zawh hawj dij goanz ruxndeq dix mboq miz gaenq ndog, dix goj mboq biad gaenq ndog, hawj daenh ruxndeq gaenq naeh singjringh, hoakzaqnaeh hoak dix zux zawh laux gaemz hax mboq miz naeh, goj zux zawh laux hawj sowh puj sinq Yezsuz byenqbaenz sowh goanz gaemz hax mboq miz naeh.

<sup>27</sup>Hoakzaqnaeh, gaenqraeuz miz gaeng baenz bongz mux? Gux haxdoq su, mboq miz gaeng bongz baenz. Gaenqraeuz zawh cholaeng gaeng byenqbaenz sowh goanz gaemz hax mboq miz naeh mux? Zawh cholaeng biak fahlih maj? Gux haxdoq su, mboq zawh, zawh cholaeng ciangzsinq. <sup>28</sup>Baenzaqnaeh, gaenqraeuz ruxndeq singjringh, dij goanz byenqbaenz sowh goanz gaemz hax

mboq miz naeh, mboq zawh cholaeng biak fahlih, zawh cholaeng ciangzsinq. <sup>29</sup>Gaenqsu faeklaih dij Sen zux zawh gaj dij Sen puj Yaeuhtaiq maj? Dix mboq zawh dij Sen puj yowngh ndai ndoij maj? Gux haxdoq su, dix goj zawh dij Sen puj yowngh ndai. <sup>30</sup>Dij Sen zux miz laux doag, dij Sen hawj sowh puj hoak diauq zauh heh naeh byenqbaenz sowh goanz gaemz hax mboq miz naeh, zawh cholaeng ciangzsinq. Dij Sen hawj sowh puj mboq zauh heh naeh byenqbaenz sowh goanz gaemz hax mboq miz naeh, goj zawh cholaeng ciangzsinq. <sup>31</sup>Hoakzaqnaeh hax, gaenqraeuz cholaeng ciangzsinq ej byenqbaenz sowh goanz gaemz hax mboq miz naeh, ej hax fahlih mboq miz luq maj? Gux haxdoq su, mboq zawh, hoakzaqnaeh hax gajfa zawh hax fahlih miz luq.

### **Yaqboahlazhanq Sinq Dij Sen, Dij Sen Zoq Rongx Dix Hoak Sowh Goanz Gaemz Hax Mboq Miz Naeh**

**4** <sup>1</sup>Laemh taeng le gaenqnaeh, gaenqraeuz aeu Yaqboahlazhanq goanz nganq boajnowx maz hax zawh puj jeq rownz raeuz naeh maz hax, <sup>2</sup>jixzawh dij Sen rongx dix hoak sowh goanz gaemz hax mboq miz naeh zawh cholaeng dix gaj loh gaj hoak hoj nauq, daengz dix hax haenh ndang'hoz dix goj haenh ndaej lox, gaj lej daengz baenzaqnaeh dix yuq doqnaj dij Sen goj mboq miz gaeng haenh hoakri ndaej. <sup>3</sup>Gaenqraeuz ruxndeq, ndaw *Sw Dij Sen* hoakzaqnaeh laemh dix, ndaw *Sw Dij Sen* hax: "Yaqboahlazhanq sinq dij Sen, dij Sen zoq rongx dix hoak sowh goanz gaemz hax mboq miz

naeh."<sup>f</sup> <sup>4</sup>Mawz saeh daenh hoak gaengx, daenh aeu vaenzriangz hawj mawz, mboq suanq zawh aeu hawj daengzhwx, zawh mawz hoj ndaej naeuj. <sup>5</sup>Gaj dij Sen hawj dij goanz hoak sowh goanz gaemz hax mboq miz naeh, mboq zawh cholaeng dij goanz hoak najgaengx gaeng, zawh cholaeng gaj dij goanz sinq dix, sinq dix zawh laux Sen aeu puj hoak loang hoak sowh goanz gaemz hax mboq miz naeh. <sup>6</sup>Daj Daqvaeq ndaej hax naeh dungzlumj, sowh puj mboq zawh cholaeng hoakri hoak gaeng zoq ndaej rongx hoak sowh goanz gaemz hax mboq miz naeh faengz zaehzaeh loh. <sup>7</sup>Daqvaeqndaej hoakzaqnaeh hax:

"Sowh puj gaenq hoakloang ndaej yangq naeh, sowh puj gaenqndog miz gaenq saeh daeb naeh faengz yah.

<sup>8</sup>Sowh dij goanz Zaeuj mboq anq gaenqloang dix naeh faengz yah."<sup>g</sup>

<sup>9</sup>Gux cham su, haenx, sowh dij goanz ndaej faengz naeh, zawh hax gaj sowh puj zauh heh naeh, rux hax daengz sowh puj mboq zauh heh naeh mux? Gaenqraeuz aeu Yaqboahlazhanq maz hax, gaenqdix zawh cholaeng sinq, dij Sen zoq rongx dix hoak sowh goanz gaemz hax mboq miz naeh. <sup>10</sup>Su ciq hax, dij Sen rongx Yaqboahlazhanqhoak sowh goanz gaemz hax mboq miz naeh, zawh zwz Yaqboahlazhanq naengzbaeq heh naeh rux zawh zwz Yaqboahlazhanq haeuz heh naeh mux? Zawh zwz naengzbaeq heh naeh, mboq zawh heh yaq zux

ndaej hoak. <sup>11</sup>Zwz dix naengz mboq hoak diauq zauh heh naeh, dix haeuz cholaeng sinq dij Sen ndaej hoak sowh goanz gaemz hax mboq miz naeh. Dix biak dij Sen hoak diauq zauh heh naeh zawh aeu diauq naeh mai nyaengx ndaw ndang dix. Dij Sen hawj dix hoak sowh goanz gaemz hax mboq miz naeh, yaq zux hawj dix hoak diauq zauh heh naeh, hoanx naeh zawh cholaeng hawj dix hoak dez sowh puj mboq zauh heh gaj sinq dij Sen, yaq ndaej rongx hoak sowh goanz gaemz hax mboq miz naeh, <sup>12</sup>goj zawh cholaeng hawj dix hoak dez sowh puj zauh heh naeh, zoq zawh hoak dez sowh puj yaeuq zauh heh, yaeuq daj zwz dix naengzbaeq heh naeh dungzlumj sinq dij Sen naeh.

<sup>13</sup>Dij Sen yinq aeu dihndin hawj Yaqboahlazhanq daj luglan Yaqboahlazhanq.\* Dij Sen hoakzaqnaeh yinq Yaqboahlazhanq, mboq zawh cholaeng Yaqboahlazhanq biak fahlih, zawh cholaeng Yaqboahlazhanq sinq dij Sen ej ndaej rongx hoak sowh goanz gaemz hax mboq miz naeh. <sup>14</sup>Jixzawh dij goanz biak daengz buq fahlih zux ndaej sowh gaenq dij Sen yinq aeu hawj naeh, venjnaeh ndaej sowh gaenq dij Sen yinq aeu hawj naeh zoq daj sinq dij Sen mboq miz gaeng ndaemndiang eh, sowh gaenq dij Sen yinq aeu hawj naeh zoq bowhbowh yinq eh. <sup>15</sup>Jixzawh mboq miz fahlih, zoq mboq miz puj hoak loang fahlih. Gaj miz fahlih zoq miz puj hoak loang fahlih, miz puj hoak loang fahlih, dij Sen zoq rux rikdwk chaenxfah.

<sup>f</sup>4:3 Gaemz naeh haeuz yuq ndaw Sw Zwz nduq 15:6.

<sup>g</sup>4:8 Gaemz kauq naeh haeuz yuq ndaw Sw Lownx 32:1-2.

\* 4:13 Zwz Nduq 22:17-18.



<sup>16</sup>Baenzaqnaeh sowh gaenq dij Sen yinq aeu hawj raeuz naeh mboq zawh cholaeng raeuz biak fahliah, zawh cholaeng raeuz sinq, hoakzaqnaeh zawh aeu hawj raeuz daengzhwx naeuj. Mboq zawh aeu hawj gaj sowh puj miz sowh Fahlih Moahciz mai naeh, goj aeu hawj sowh puj daj Yaqboahlazhanq dungzlumj sinq dij Sen naeh. Yaqboahlazhanq yuq doqnaj dij Sen hoak dez daengzle gaenqraeuz; sowh gaenq dij Sen yinq aeu hawj raeuz naeh zawh yumq aeu hawj daengzle luglan Yaqboahlazhanq. <sup>17</sup>Zoq daj ndaw *Sw Dij Sen* hax naeh dungzlumj: "Gux haeuz hawj mawz hoak dez lai yowngh dij goanz."<sup>h</sup> Dij Sen Yaqboahlazhanq sinq naeh zawh dij Sen hawj puj tai daeuq zaeu, hawj sowh gaenq bwnz naengz mboq miz naeh byenqbaenz gaenq miz naeh.

<sup>18</sup>Zwz Yaqboahlazhanq lumjzaq dih ngwz mboq miz naeh, dix goj naengzgaj ngwz, naengzgaj sinq dij Sen rux hawj dix miz lug, baenzaqnaeh dix zoq baenz dez lai yowngh dij goanz, daj ndaw *Sw Dij Sen* hax naeh dungzlumj: "Mawz lez ndaundiq ndaw fax, luglan mawz toj miz lai baenzaqnaeh mboqyaq."<sup>\*</sup> <sup>19</sup>Zwz dix zaekgaj ndaej baeg bi naeh, dix nwh taeng ndang hoakri haeuz damz daj tai yaq dungzlumj, Sazlaz goj haeuz mboq rux zowngx lug, dix goj naengz gaj sinq dij Sen lumjgaeuq, mboq cauz dit rawz, <sup>20</sup>goj mboq sanz hax mboq sinq ej huaihyih gaenq dij Sen yinq naeh, gajfa sinq vwnxcih, biangz dij Sen. <sup>21</sup>Cholaeng dix sinq dij Sen toj rux hoak gaenq dij Sen ndaej yinq dix naeh, <sup>22</sup>dij Sen zoq rongx dix hoak sowh goanz gaemz hax mboq miz naeh. <sup>23</sup>"Rongx dix hoak sowh

goanz gaemz hax mboq miz naeh," gaemz kauq naeh mboq zawh daegdaeg how gaj dix laiz, <sup>24</sup>goj zawh how gaenqraeuz sowh puj ndaej rongx hoak sowh goanz gaemz hax mboq miz naeh laiz, zoq zawh gaenqraeuz sowh puj sinq dij Sen, laux hawj Zaeuj raeuz Yezsuz tai yaq daeuq zaeu naeh. <sup>25</sup>Yezsuz zoah aeu mwz hawj daenh kaj, zawh cholaeng sowh gaenq raeuz hoak loang naeh. Hawj dix daeuq zaeu zawh cholaeng hawj raeuz ndaej rongx hoak sowh goanz gaemz hax mboq miz naeh.

### Cholaeng Yezsuz Jizduz Gaenqraeuz

#### Ndaej Yuq Ndaw Dij Sen Faengz

**5**<sup>1</sup>Taeng'hax gaenqraeuz cholaeng sinq Zaeuj raeuz Yezsuz Jizduz ej ndaej rongx hoak sowh goanz gaemz hax mboq miz naeh, venjnaeh, gaenqraeuz haeuz cho'mbaiq dix daj dij Sen dungzndae eh. <sup>2</sup>Gaenqraeuz goj cho'mbaiq dix, cholaeng sinq dix, ndaej ndonj mwz doqnaj dij Sen, dix yumq doiq raeuz ndae, hawj raeuz in ndaej vwnx. Gaenqraeuz goj ruxndeq mwznaj gaenqraeuz toj ndaej sowh najta dij Sen aeu hawj raeuz naeh mboqyaq, baenzaqnaeh gaenqraeuz faengz nyauznyauz. <sup>3</sup>Mboq zawh faengz laeng gaj le gaenqnaeh, gaenqraeuz jinkaem zwzrawz, gaenqraeuz goj faengz laeng jinkaem. Baenzaqrawz hoakzaqnaeh hax mah? Gaenqraeuz ruxndeq, gaenqraeuz jinkaem gaenqraeuz zux gaj laeng gaj rux gaemx, <sup>4</sup>gaenqraeuz gaj laeng gaj rux gaemx, gaenqraeuz zoq sowh kaem rawz goj jin ndaej, gaenqraeuz sowh kaem rawz goj jin

<sup>h</sup>4:17 Gaemz kauq naeh haeuz yuq ndaw Sw Zwz nduq 17:5.

<sup>\*</sup>4:18 Zwz Nduq 15:5.

ndaej, gaenqraeuz zoq miz gaenq ngwz. <sup>5</sup>Gaenq gaenqraeuz ngwz naeh toj mboq rux bowhbowh ngwz. Baenzaqrawz hoakzaqnaeh hax mah? Dij Sen haeuz aeu minghkoan dix hawj raeuz, minghkoan dix hawj raeuz ruxndeq dix nwh raeuz taeuq, goj hawj raeuz rux nwh puj ndai. <sup>6</sup>Zwz gaenqraeuz naengz dih maengx mboq miz naeh, Jizduz haeuz nganqzauq sowh gau dij Sen dingq naeh how puj hoak loang raeuz tai. <sup>7</sup>Damz mboq miz gawz rux how sowh puj biak fahlih haenlaez-haenlih naeh tai. Sowh puj zawndae naeh mbangjzwz naengz rux miz dij goanz how dix tai. <sup>8</sup>Gaj zwz raeuz naengz zawh puj hoak loang naeh, dij Sen haeuz hawj Jizduz how raeuz tai. Dix hoakzaqnaeh hoak hawj raeuz ruxndeq dix nwh raeuz baenzaqrawz. <sup>9</sup>Taeng'hax Jizduz tai, lowd dix hawj raeuz ndaej hoak sowh goanz gaemz hax mboq miz naeh, venjnaeh, dix hoakrawz mboq jeuq raeuz hawj raeuz mboq zoah dij Sen rik dwk, chaenxfah mux? <sup>10</sup>Baenzaqrawz hoakzaqnaeh hax mah? Taeng'hax zwz raeuz daj dij Sen hoak dangqbaih naeh, dij Sen naengz hawj lug zaiz dix how raeuz tai, hawj raeuz daeuq daj dix dungzndae, haenx, gannaeh raeuz haeuz daj dix dungzndae yaq, dix hoakrawz mboq cholaeng lug zaiz dix daeuq zaeu ej jeuq raeuz mux? <sup>11</sup>Mboq zawh gaj gaenqnaeh, zaeuj raeuz Yezsuz Jizduz hawj gaenqraeuz daj dij Sen dungzndae yaq, goj hawj gaenqraeuz nwh ndaej dij Sen zoq faengz.

### **Aeu Yaqdangz Daj Yezsuz Dungzbij**

<sup>12</sup>Cholaeng goanz doag hoak loang, dij goanz dihndin zoq rux hoak loang, cholaeng dij goanz

hoak loang, dij goanz zoq rux tai. Cholaeng gaj goanz gaj hoak loang, gaj goanz gaj rux tai. <sup>13</sup>Zwz naengz mboq miz fahlih naeh, dij goanz dihndin haeuz hoak loang, gaj zwz naengz mboq miz fahlih naeh, dij Sen zoq mboq mai sowh gaenq dij goanz hoak loang naeh. <sup>14</sup>Gaj daeq Yaqdangz daeuj taeng Moahciz, dij goanz gawz goj miz vaenz tai, daengz sowh puj mboq zawh daj Yaqdangz hoak loang dungzlumj naeh, goj zaemh miz vaenz tai. Yaqdangz lumj Yezsuz goanz daeuj doaklaeng dix naeh. <sup>15</sup>Gaj gaenq Yaqdangz hoak loang naeh mboq ndeu gaenq dij Sen yumq doiq dij goanz ndae naeh. Taeng'hax cholaeng goanz ux hoak loang, rux hawj daengzle miz vaenz tai, haenx, gaenq dij Sen doiq dij goanz ndae daengzhwx naeh daj sowh gaenq ndae dij Sen yuq ndaw Yezsuz Jizduz how goanzlai hoak naeh, mboq gajfa dwx nyeuz lai mawx? <sup>16</sup>Yaqdangz hoak loang hawj raeuz baenz zaq ux, dij Sen yumq doiq raeuz ndae aeu Yezsuz hawj raeuz haeggaj hawj raeuz baenz zaq ux. Cholaeng goanz doag Yaqdangz, dij goanz dihndin zoah saenxpanq, dij Sen hax paenqdix hoak loang. Gaj zwz raeuz naengz miz gaenq hoakloang lai taeuq naeh, dij Sen yumq doiq raeuz ndae aeu Yezsuz hawj raeuz, hawj raeuz ndaej hoak sowh goanz gaemz hax mboq miz naeh! <sup>17</sup>Taeng'hax goanz doag Yaqdangz hoak loang, rux hawj dij goanz dihndin daengzle miz vaenz tai, haenx, Yezsuz Jizduz how dij goanz tai, sowh dij goanz cholaeng dix ndaej gaenq ndae yaengh ndae yaq ndaej hoak sowh goanz gaemz hax mboq miz naeh mboq gajfa ndaej aen mingh daengznauq naeh mawx? <sup>18</sup>Hoakzaqnaeh lez maz, cholaeng Yaqdangz mbaed gaengnaeh hoak loang, dij goanz

dihndin daengzle zoq zoah saenxpanq, dij Sen hax paenqdix hoak loang; dungzlumj, cholaeng Yezsuz mbaed gaengnaeh hoak ndae, hawj dij goanz dihndin ndaej yuq ndaw zaw dij Sen rongx hoak sowh goanz gaemz hax mboq miz naeh baenz, ndaej aen mingh baenz!

<sup>19</sup>Cholaeng Yaqdangz mboq biak kauq dij Sen, goanzlai zoq baenz puj hoak loang; dungzlumj, cholaeng Yezsuz biak kauq dij Sen, goanzlai zoq baenz sowh goanz gaemz hax mboq miz naeh. <sup>20</sup>Dij Sen hawj miz fahliah, zawh hawj sowh gaenq dij goanz hoak loang naeh meq maz lai, gaj gaenq hoakloang meq maz lai, sowh gaenq dij Sen yumq yangq dij goanz naeh zoq gaj laeng gaj miz lai. <sup>21</sup>Dij goanz gaj goanz gaj miz gaenq ndog rangh ndang, gaj goanz gaj miz vaenz tai, gaj dij Sen yumq doiq dij goanz ndae daengzhwx, hawj dij goanz yuq ndaw zaw dix hoak sowh goanz gaemz hax mboq miz naeh, hawj dij goanz cho'mbaiq Zaeuj raeuz Yezsuz Jizduz ndaej aen mingh daengznauq naeh.

### **Doiq Gaenq Hoakloang Maz Hax Gaenqraeuz Haeuz Tai, Gaenqraeuz Zawh Zaeu Laeng Jizduz**

**6**<sup>1</sup>Haenx! Gaenqraeuz baenz goq goq hoak loang hawj sowh gaenq dij Sen yumq yangq gaenqraeuz naeh gaj laeng gaj miz lai maj? <sup>2</sup>Mboq rux zawh daengzhwx! Doiq gaenq hoakloang maz hax, gaenqraeuz haeuz tai yaq, gaenq hoakloang gvanx mboq zoah gaenqraeuz eh, baenzzaqnaeh gaenqraeuz mboq baenz dajndij daeuq bae hoak loang ejmbowh. <sup>3</sup>Gaenqsu mboq ruxndeq maj?

Gaenqraeuz hoak diauq zauh soiq naeh zawh hax gaenqraeuz zawh dij goanz Jizduz Yezsuz, zoq zawh hoak diauq zauh soiq naeh daj dix zaemh tai.<sup>4</sup> Gaenqraeuz hoak diauq zauh soiq naeh daj dix zaemh tai, daj dix zaemh moak, zawh hawj raeuz hoak goanz mawq zaeu, daj Jizduz cholaeng doakriangz dwx Dez ndaw fax tai yaq daeuq zaeu dungzlumj.

<sup>5</sup>Jixzawh gaenqraeuz goj hoakzaq Jizduz naeh tai, daj dix hoak boangx ndeu, gaenqraeuz goj toj hoakzaq dix naeh daeuq zaeu. <sup>6</sup>Gaenqraeuz ruxndeq, goanz gaeuq raeuz haeuz daj Jizduz zaemh yuq now maexngamzchaz tai, hawj ndang hoak loang raeuz naeh lown, hawj raeuz hoakkoij gaenq hoakloang gah. <sup>7</sup>Unj, puj tai haeuz zoah gaenq hoakloang gvanx gah. <sup>8</sup>Jixzawh gannaeh gaenqraeuz daj Jizduz zaemh tai, gaenqraeuz ruxndeq bae'naj gaenqraeuz toj ndaej daj dix zaemh zaeu mboqyaq. <sup>9</sup>Gaenqraeuz ruxndeq, Jizduz haeuz tai yaq daeuq zaeu, dix toj mboq rux tai tem, tai goj daeuq gvanx dix mboq ndaej. <sup>10</sup>Baenzzaqrawz mah? Dix tai, zawh hawj gaenq hoakloang gvanx dij goanz gah, tai mbaed doag doag ux zoq baenz nauq. Dix zaeu zawh vaeq dij Sen zaeu. <sup>11</sup>Gaenqsu goj hoj hoakzaqnaeh, doiq gaenq hoakloang maz hax, gaenqsu zoq aeu hoakri daj tai yaq dungzlumj, laek daeuq bae hoak loang tem mbeh, gaj yuq ndaw Jizduz Yezsuz, gaenqsu yauq vaeq dij Sen zaeu.

<sup>12</sup>Baenzzaqnaeh, laek hawj gaenq hoakloang gvanx ndaw ndang su, zoq zawh ndang toj rux tai mboqyaq naeh, mboq jinx biak boajnowx gaenqsu

---

<sup>i</sup>6:3 *Hoak diauq zauh soiq naeh* zawh hax gaenq ux baenzzaqnaeh, zoq zawh sowh puj hax venq sinq Yezsuz naeh dix yuq doqnaq goanzlai yinq Yezsuz hoak Zaeuj, yaq miz goanz zoq aeu dix yup bae ndaw naemx, rux aeu naemx sauq yuq now to dix.

bae hoak. <sup>13</sup>Goj laek hawj boajnowx su baenz koang'hoq mbowq. Gaj aeu hoakri daj tai yaq daeuq zaeu dungzlumj, aeu hoakri hawj dij Sen, hawj hoakri baenz koang'hoq ndae. <sup>14</sup>Baenzzaqrawz mah? Dij Sen gvanx gaenqraeuz, dix mboq zawh aeu sowh fahliah Moahciz mai naeh gvanx, dix zawh yumq doiq raeuz ndae daengzhwx, baenzzaqnaeh gaenq hoakloang gvanx su mboq ndaej.

### Hoak Puj koj Gaenq hoj

<sup>15</sup>Haenx, gaenqraeuz hoj hoakzaqrawz hoak mux? Dix gvanx gaenqraeuz, dix mboq zawh aeu sowh fahliah Moahciz mai naeh gvanx, dix zawh yumq doiq raeuz ndae daengzhwx, hoanx naeh ej hawj gaenqraeuz hoak loang maj? Mboq rux zawh daengzhwx! <sup>16</sup>Gaenqsu mboq ruxndeq maj? Gaenqsu aeu hoakri hoakkoij daenh, biak gawz zoq zawh hoak puj koj gawz. Yauqmbeh'ej hoak puj koj gaenq hoakloang, yaq zoah tai; yauqmbeh'ej hoak puj koj gaenq hoj, yaq ndaej yuq ndaw zaw dij Sen hoak sowh goanz gaemz hax mboq miz naeh. <sup>17</sup>Mbaiq dij Sen gvaqlah! Daengz koax daekgoanq gaenqsu hoak puj koj gaenq hoakloang, gannaeh gaenqsu goj aeu daengz zaw biak sowh kauq piu zau su naeh. <sup>18</sup>Gaenqsu haeuz mboq zoah gaenq hoakloang gvanx eh, ndaej zoangq og daeuj eh, gannaeh haeuz zawh puj koj gaenq hoj. <sup>19</sup>Gux baenzzaqrawz goq goq aeu puj koj maz bixliq daj gaenqsu hax mah? Zawh gux mbu jixzawh mboq aeu puj koj maz bixliq hax hawj gaenqsu biak, gaenqsu mboq ruxndeq gux hax gaeng. Koax daekgoanq gaenqsu hoakzaqrawz aeu boajnowx su hoak puj koj sowh saeh mboq saw naeh daj sowh saeh

ndoagndaeg naeh, hawj hoakri gaj laeng gaj mbowq, gannaeh gaenqsu goj yauq zaemh hoakzaqrawz aeu boajnowx su hoak puj koj gaenq hoj, hawj hoakri gaj laeng gaj saw. <sup>20</sup>Zwz gaenqsu hoak puj koj gaenq hoakloang naeh, gaenq hoj zoq gvanx mboq zoah su. <sup>21</sup>Sowh saeh gannaeh gaenqsu ruxndeq laizlom naeh, zwz naeh gaenqsu hoak, ndaej gaeng mbaeuqmux? Sowh saeh naeh rux hawj gaj dij goanz lon naeuh. <sup>22</sup>Gaj gannaeh, gaenqsu haeuz mboq zoah gaenq hoakloang gvanx eh, ndaej zoangq og daeuj eh, gannaeh gaenqsu zawh hoak puj koj dij Sen, zoq rux hoak saeh ndae, gaj laeng gaj saw, doaklaeng ndaej aen mingh daengznauq naeh. <sup>23</sup>Unj, mawz aeu gaenq hoakloang hoak zaeuj, dix zoq aeu tai hoak vaenzriangz hawj mawz, gaj mawz aeu dij Sen hoak Zaeuj, sowh gaenq ndae dij Sen aeu hawj daengzhwx naeh zawh aen mingh daengznauq, zoq zawh yuq ndaw Zaeuj raeuz Jizduz Yezsuz ndaej aen mingh daengznauq naeh.

### Mboq Zawh Maengx Sowh Gaenq Mbaednduq Zauh Naeh Kvej Dij Sen, Zawh Maengx Minghkoan Dij Sen Kvej Dij Sen

**7** <sup>1</sup>Paenq bihnongx aj, gaenqsu zawh sowh puj ruxndeq fahliah naeh, gaenqsu ruxndeq, fahliah gvanx dij goanz zawh zwz dij goanz naengz zaeu naeh. <sup>2</sup>Zoq baenzzaq goanz puj nyingz ux haeuz baenzrownz yaq naeh dungzlumj, zwz po dix naengz zaeu naeh, nganq fahliah maz hax, zoq mboq jinx daeuq kai hawj puj zaiz ndai hoak mez. Gaj jixzawh po dix tai yaq, dix zoq mboq zoah sowh fahliah naeh gvanx. <sup>3</sup>Baenzzaqnaeh, zwz po dix naengz zaeu naeh, jixzawh dix daeuq kai hawj puj ndai hoak

mez, fahliah zoq hax dix hoak loang gaenqnaeh. Gaj jixzawh po dix haeuz tai yaq, dix zoq mboq zoah sowh fahliah naeh gvanx, daengz dix daeuq kai hawj puj zaiz ndai, fahliah goj mboq hax dix hoak loang.

<sup>4</sup> Paenq bihnongx gux aj, gaenqsu goj haeuz daj sowh fahliah laemh po'mez naeh dungzlumj, gaenqsu cho'mbaiq ndang Jizduz, doiq sowh fahliah Moahciz mai naeh maz hax, gaenqsu goj haeuz tai yaq, haeuz mboq zoah sowh fahliah naeh gvanx, gaenqsu haeuz suhyih kai hawj goanz mawq, zoq zawh kai hawj Jizduz goanz tai yaq daeuq zaeu naeh, baenznaeh hawj gaenqraeuz hoak maexmaeg dij Sen, kwnj maeg hawj dij Sen. <sup>5</sup> Zwz raeuz biak boajnowx raeuz zaeu naeh, gaenqraeuz ceu hoak gaenqndog, miz fahliah, ndaw zaw gaenqraeuz ej gajfa ceu hoak gaenqndog, yaq gaenqraeuz zoq rux hoak gaenqndog, daj sowh maex maeg kwnj sowh maeg rux hawj dij goanz lon naeh dungzlumj.

<sup>6</sup> Gaj gannaeh, doiq sowh fahliah mbaednduq puk raeuz naeh maz hax, gaenqraeuz haeuz tai yaq, fahliah haeuz gvanx mboq zoah raeuz. Baenzzaqnaeh gannaeh gaenqraeuz mboq zawh hoakzaq sowh gaenq fahliah nemz naeh kvej dij Sen, zawh hoak zaq mawq kvej dij Sen, zoq zawh hoak zaq Minghkoan dij Sen nemz naeh kvej dij Sen.

### **Fahliah Daj Gaenq Hoakloang**

<sup>7</sup> Baenzzaqnaeh, gaenqraeuz hoakzaqrawz hax mux? Fahliah zawh gaenq hoakloang maj? Mboq rux zawh daengzhwx! Jixzawh mboq miz fahliah, gux zoq mboq ruxndeq gaeng zawh gaenq hoakloang. Jix mboq zawh fahliah hax "Mboq jinx ceu gaenq daenh," gux zoq mboq ruxndeq hoakzaqrawz hoak suanq

zawh ceu gaenq daenh. <sup>8</sup> Gaj gaenq hoakloang rangh ndang gux, dix chaenqjiz aeu sowh gaenq dij Sen nemz naeh hawj zaw gux ceu yowngh ceu yowngh. Mboq miz fahliah, gaenq hoakloang zoq daj puj tai dungzlumj, gvanx mboq zoah gux. <sup>9</sup> Zwz mboq miz fahliah naeh, gux zawh puj zaeu, gaj miz sowh gaenq dij Sen nemz naeh maz, gaenq hoakloang zaeu, gux zoq tai eh. <sup>10</sup> Sowh gaenq dij Sen nemz naeh mbaednduq zawh hawj dij goanz zaeu, gaj dix gajfa hawj gux tai. <sup>11</sup> Unj, gaenq hoakloang rangh ndang gux, dix chaenqjiz aeu sowh gaenq dij Sen nemz naeh yai gux, yaq kaj gux tai. <sup>12</sup> Hoakzaqnaeh lez maz, gaenq hoakloang zux zawh gaenq ndoag, fahliah zawh gaenq saw, sowh gaenq dij Sen nemz naeh zawh gaenq saw, zawh gaenq hoj, zawh gaenq ndae.

<sup>13</sup> Hoakzaqnaeh hax maz, zawh gaenq ndae hawj gux tai maj? Mboq rux zawh daengzhwx! Zawh gaenq hoakloang hawj gux tai. Sowh gaenq dij Sen nemz naeh zawh gaenq ndae, hawj gux ruxndeq gaenqrawz zawh gaenq mbowq, ruxndeq singjringh. Gaj gaenq hoakloang aeu sowh gaenq dij Sen nemz naeh hawj gux tai. Dij Sen hawj gaenq hoakloang hoakzaqnaeh hoak zawh cholaeng hawj gaenqraeuz gajfa ruxndeq gaenq hoakloang mbowq baenzzaqrawz. <sup>14</sup> Gaenqraeuz ruxndeq, fahliah zawh daeq zawj dij Sen daeuj, gaj gaenqgux zawh dij goanz naeuj, gaenqgux haeuz kai hawj gaenq hoakloang, baenz puj koj gaenq hoakloang. <sup>15</sup> Baenzzaqrawz hoakzaqnaeh hax mah? Sowh gaenq gux hoak naeh, gux mboq ruxndeq gux baenzzaqrawz bae hoak. Sowh gaenq gux zawh hoak naeh, gux mboq bae hoak, sowh gaenq gux ywjhwnq naeh, gux ej gajfa bae hoak. <sup>16</sup> Jixzawh

sowh gaenq gux hoak naeh daengz gux goj mboq zawx hoak, zoq zawh hax gux yinq fahlih zawh gaenq ndae. <sup>17</sup> Baenzaqnaeh, sowh gaenq gux hoak naeh, mboq zawh gaenqgux hoak, zawh miz gaenq ndog rangh ndang gux, gux haeg hoak haeg mboq ndeq. <sup>18</sup> Gux ruxndeq, yuq ndaw gux, zoq zawh yuq ndaw boajnowx gux, mboq miz gaenq ndae. Baenzaqrawz mah? Gux zawx hoak saeh ndae, gaj hoak zaeh maz hoak mboq baenz. <sup>19</sup> Sowh saeh ndae gux zawx hoak naeh, gux mboq bae hoak. Sowh gaenqndog gux mboq zawx hoak naeh, gux ej gajfa bae hoak. <sup>20</sup> Jixzawh gux hoak sowh gaenq gux mboq zawx hoak naeh, zoq mboq zawh gaenqgux hoak, zawh miz gaenq ndog rangh ndang gux, gux haeg hoak haeg mboq ndeq.

<sup>21</sup> Baenzaqnaeh, gannaeh gux ruxndeq diauq ux, gux zawx hoak saeh ndae zwzrawz, gaenqndog zoq nwk gux. <sup>22</sup> Ndaw zaw gux dauq ngaiq fahlih dij Sen. <sup>23</sup> Gaj boajnowx gux haeggaj miz diauq ux, diauq naeh zawh diauq hoak loang, dix daj diauq ndaw zaw gux nwh naeh dungzdix, gaemh gux bae hoak loang. <sup>24</sup> Gux nanh zaeh loh! Gawz rux jeuq gux ni boajnowx rux hawj gux lon naeh mux? <sup>25</sup> Mbaiq dij Sen gvaqlah, cho'mbaiq Zaeuj raeuz Yezsuz Jizduz zoq ndaej jeuq. Hoakzaqnaeh lez maz, ndaw zaw gux biak dij Sen, gaj boajnowx gux biak sowh diauq hoak loang naeh.

## Yuq Ndaw Minghkoan Dij Sen Zoq Baenz

### Biak Minghkoan Dij Sen Bae Hoak

**8** <sup>1</sup> Gannaeh, sowh puj yuq ndaw Jizduz Yezsuz naeh dij Sen zoq mboq hawj paenqdix haeggaj tw'taeb gaenq hoakloang hoakri eh. <sup>2</sup> Baenzaqrawz hoakzaqnaeh hax mah? Minghkoan dij Sen yuq ndaw Jizduz Yezsuz aeu aen mingh hawj gux, zoangq gux daeq dawj mungz diauq hoak loang, diauq ka loh tai naeh og daeuj.<sup>j</sup> <sup>3</sup> Cholaeng dij goanz biak daengz buq fahlih mboq baenz, fahlih zoq jeuq dij goanz mboq baenz. Gaenq fahlih hoak mboq taeng naeh, dij Sen haeuz hoak eh. Dij Sen nemz lug zaiz hoakri hoak dij goanz daeuj dihndin, dix hawj ndang lug dix daj ndang dij goanz raeuz dungzlumj, gaj lug dix mboq sanz hoak loang. Dij Sen aeu ndang lug dix hoak sowh gaenq mbud daeb gaenq dij goanz hoak loang naeh, hawj gaenq hoakloang gvanx dij goanz gah, <sup>4</sup> hawj sowh gaenq ndae fahlih yaix hoak naeh, yuq ndaw ndang gaenqraeuz hoak og maz, zoq zawh yuq ndaw ndang gaenqraeuz sowh puj mboq biak boajnowx bae hoak zawh biak Minghkoan dij Sen bae hoak naeh. <sup>5</sup> Unj biak boajnowx zoq nwh sowh saeh boajnowx zawx hoak naeh, biak Minghkoan dij Sen zoq bae nwh sowh saeh Minghkoan dij Sen zawx hoak naeh. <sup>6</sup> Nwh sowh saeh boajnowx zawx hoak naeh zoq zoah lon, nwh sowh saeh Minghkoan dij Sen zawx hoak naeh zoq ndaej zaeu, ndaej yuqndae yuqvangq.

<sup>7</sup> Baenzaqrawz hoakzaqnaeh hax mah? Nwh sowh

---

**j8:2** *Baenzaqrawz hoakzaqnaeh hax mah? Minghkoan dij Sen yuq ndaw Jizduz Yezsuz aeu aen mingh hawj gux, zoangq gux daeq dawj mungz diauq hoak loang, diauq ka loh tai naeh og daeuj. Gaemz naeh, mbangj bwnz goj hax: Baenzaqrawz hoakzaqnaeh hax mah? Minghkoan dij Sen yuq ndaw Jizduz Yezsuz aeu aen mingh hawj mawz, zoangq mawz daeq dawj mungz diauq gaenqndog, diauq ka loh tai naeh og daeuj.*

saeh boajnowx zawx hoak naeh zoq daj dij Sen hoak dangqbaih, mboq biak fahlih dij Sen, daengz biak goj biak mboq baenz. <sup>8</sup> Sowh dij goanz biak boajnowx bae hoak naeh mboq rux ndaej hawj dij Sen zaemz.

<sup>9</sup> Gaj Minghkoan dij Sen haeuz ndowj ndaw su, gaenqsu zoq mboq zawh sowh puj biak boajnowx bae hoak naeh, zawh sowh puj biak Minghkoan dij Sen bae hoak naeh. Jixzawh gawz mboq miz Minghkoan Jizduz, Jizduz zoq mboq aeu dix hoak dij goanz dix. <sup>10</sup> Ndang su cholaeng gaenq hoakloang zoah tai, gaj jixzawh Jizduz yuq ndaw su, gaenqsu zoq zawh sowh goanz gaemz hax mboq miz naeh, Minghkoan dij Sen zoq hawj su zaeu. <sup>11</sup> Jixzawh Minghkoan laux hawj Yezsuz tai yaq daeuq zaeu naeh yuq ndaw su ndowj, laux hawj Jizduz Yezsuz tai yaq daeuq zaeu naeh goj toj aeu Minghkoan yuq ndaw su naeh hawj ndang su daeuq zaeu, zoq zawh hawj ndang tai mboqyaq naeh daeuq zaeu.

<sup>12</sup> Daengzle bihnongx aj, hoakzaqnaeh lez maz, gaenqraeuz zawh puj baznij, gaj mboq zawh baznij boajnowx, mboq zawh baznij boajnowx, zoq mboq zawh biak boajnowx zaeu. <sup>13</sup> Jixzawh gaenqsu biak boajnowx zaeu, gaenqsu toj lon mboqyaq. Gaj jixzawh gaenqsu maengx Minghkoan dij Sen yaq hawj sowh gaenqndog ndaw ndang hoak naeh tai, gaenqsu toj zaeu mboqyaq. <sup>14</sup> Unj, gawz zoah Minghkoan dij Sen lingz, gawz zoq zawh lug dij Sen. <sup>15</sup> Minghkoan su ndaej naeh mboq zawh minghkoan hoak puj koj, mboq zawh hawj su naengzgaj mbu. Minghkoan su ndaej naeh zawh minghkoan hawj su ndaej hoak lug naeh. Baenzzaqnaeh gaenqraeuz rongx dij Sen: "Dez aj, boh aj!" <sup>16</sup> Minghkoan raeuz

hax gaenqraeuz zawh lug dij Sen, Minghkoan dij Sen goj zaemh hax raeuz zawh lug dij Sen. <sup>17</sup> Jixzawh gaenqraeuz zawh lug dij Sen, gaenqraeuz toj ndaej sowh gaenq dij Sen yinq aeu hawj naeh, zoq zawh daj Jizduz zaemh ndaej sowh gaenq dij Sen yinq aeu hawj naeh. Gaenqraeuz daj dix zaemh jin kaem, toj daj dix zaemh ndaej najta mboqyaq.

### Mwznaj Ndaej Najta

<sup>18</sup> Gux nwh maz, gannaeh daengz jin kaem gajrawz gojvenj, aeu bij sowh najta mwznaj dij Sen aeu hawj raeuz naeh maz hax, sowh gaenq kaem gannaeh mboq suanq zawh gaeng saek'i. <sup>19</sup> Daengzle sowh gaenq zoah chauq naeh gaeng goj zawx taen vaenz dij Sen hawj daengzle taen paenq lug dix naeh, nwh niakniak. <sup>20–21</sup> Baenzzaqrawz hoakzaqnaeh hax mah? Sowh gaenq zoah chauq naeh dij Sen hawj gaeng goj rux tai rux vaih, gaeng goj mboq miz luq, mboq zawh sowh gaenq zoah chauq naeh hoakri haeggaj venq, zawh dij Sen hawj paenqdix baenzzaqnaeh. Gaj taeng zwz ux maz, dij Sen hawj paenqdix baenzzaqnaeh gah, hawj paenqdix daj paenq lug dij Sen zaemh miz najta, baenz gaenq mawq daengznauq. Dij Sen hoakzaqnaeh daengzle sowh gaenq zoah chauq naeh zoq miz yowngh ngwz. <sup>22</sup> Gaenqraeuz ruxndeq, sowh gaenq zoah chauq naeh daengzle zaemh gongz, chaej daj sowh gau puj nyingz zaekgaj zowngx lug naeh dungzlumj, gannaeh goj zawh venj naeh. <sup>23</sup> Mboq zawh gaj le gaenqnaeh gongz, daengz gaenqraeuz ndaej sowh maeg baenz daekgoanq naeh, zoq zawh ndaej Minghkoan dij Sen naeh, ndaw zaw goj naengz zaemh gongz, taj dij Sen caeu raeuz hoak lug dix,

nwh niakniak, zoq zawh taj vaenz dix taeq ndang raeuz dauh maz naeh. <sup>24</sup>Gaenqraeuz ndaej jeuq gaenqraeuz zoq miz yowngh ngwz; ngwz zawh ngwz sowh gaenq naengz mboq ndaej naeh, jixzawh haeuz ndaej yaq, zoq mboq suanq zawh ngwz. <sup>25</sup>Gaj sowh gaenq raeuz ngwz naeh gaenqraeuz naengz mboq ndaej, gaenqraeuz zoq rux caqsiq taj, nwh niakniak.

<sup>26</sup>Mboq zawh gaj miz yowngh ngwz, gaenqraeuz oanq'e zwzrawz, Minghkoan dij Sen goj saeh gaenqraeuz. Unj sowh zwz gaenqraeuz mboq ruxndeq hoj hoakzawz vanz naeh, Minghkoan dij Sen goq gongz gongz, aeu sowh kauq hax og maz mboq baenz naeh saeh raeuz vanz dij Sen. <sup>27</sup>Daengz gaenqraeuz mboq ruxndeq hoj hoakzawz vanz, dij Sen jem ndaw zaw dij goanz naeh, dix ruxndeq Minghkoan dix hax gaeng, nwh gaeng. Unj, Minghkoan dix zawh tw'zaw dix saeh dij goanz dix vanz. <sup>28</sup>Gaenqraeuz ruxndeq, dawj fax saeh ndae gojndae, daengz saeh ndog goj venj naeh, dij Sen rux hawj yuq now to sowh puj ngaiq dix naeh baenz saeh ndae nauq, zoq zawh hawj sowh dij goanz dix hoakzawz gaenq dix dingq yaq ej rongx maz nowngz dix naeh ndae. <sup>29</sup>Zawh dij Sen haeuz bwnz ruxndeq paenq goanz naeh, dix goj haeuz bwnz lowg paenqdix, hawj paenqdix ndaej yaiz lug zaiz dix, hawj lug zaiz to dix miz nongx lai taeuq. <sup>30</sup>Sowh dij goanz dix bwnz lowg naeh, dix rongx paenqdix maz nowngz dix. Sowh dij goanz dix rongx maz nowngz dix naeh, dix hawj paenqdix hoak sowh goanz gaemz hax mboq miz naeh. Sowh goanz gaemz hax mboq miz naeh, dix hawj paenqdix ndaej najta.

### Dij Sen Ngaiq Dij Goanz Taeuq

<sup>31</sup>Hoakzaqnaeh, gaenqraeuz naengz hax gaeng tem mah? Jixzawh dij Sen saeh raeuz, gawz naengz dix raeuz ndaej mux? <sup>32</sup>Dix daengz lug zaiz hoakri naengz cez ndaej aeu taeq gaenqraeuz, yowngh ndai dix hoakrawz mboq aeu hawj raeuz daengzhwx mux? <sup>33</sup>Zawh hoakri dij Sen haeggaj lowg raeuz, rongx raeuz hoak sowh goanz gaemz hax mboq miz naeh, baenzzaqnaeh toj mboq rux miz gawz gauq gaenqraeuz ndaej. <sup>34</sup>Zawh Jizduz Yezsuz how gaenqraeuz tai. Mboq zawh gaj tai yaq, dix goj haeuz daeuq zaeu eh, gannaeh dix yuq baih qensa dij Sen, saeh gaenqraeuz hax, baenzzaqnaeh toj mboq rux miz gawz hawj gaenqraeuz haeggaj tw gaenqloang hoakri. <sup>35</sup>Jizduz nwh dij goanz baenzzaqnaeh, gaeng rux hawj raeuz daj dix dungzbyaeg mux? Zawh aen nanq maj? Zawh jin kaem maj? Zawh daenh vazkuz maj? Zawh jenjyaeg maj? Zawh mboq miz ndangnungh maj? Zawh miz sowh saeh nyinzndang naeh maj? Zawh zoah aeu remz kaj maj? <sup>36</sup>Sowh saeh naeh lej rux miz mboqyaq, daj ndaw *Sw Dij Sen* hax naeh dungzlumj:

"Dij Sen aj, cholaeng gaenqmawz,  
gaenqpiu daengz vaenz gau gau miz dij goanz  
zoah kaj,  
daenh lez gaenqpiu daj sowh dij mbej zaekgaj  
aeu kaj naeh dungzlumj."<sup>k</sup>

<sup>37</sup>Gaj maengx Zaeuj nwh raeuz naeh, daengz miz gaeng saeh raeuz goj bex mboqyaq, gaeng

<sup>k</sup>8:36 Gaemz naeh haeuz yuq ndaw *Sw Lownx* 44:22.



goj mboq rux hawj raeuz daj dix dungzbyaeg. <sup>38–39</sup>Baenzaqrawz hoakzaqnaeh hax mah? Gux ruxndeq singjringh, dij Sen nwh sowh dij goanz yuq ndaw Zaeuj raeuz Jizduz Yezsuz naeh, nwh daengznauq. Raeuz tai gojndae, zaeu gojndae, dix goj naengz nwh raeuz; bin dij Sen gojndae, sowh bin yuq ndaw fax gvanx naeh gojndae, sowh gaenq miz doakriangz naeh gojndae, mboq miz gaeng hawj raeuz daj dij Sen dungzbyaeg ndaej; gaenq gannaeh gojndae, gaenq mwznaj gojndae, gaeng goj mboq rux hawj dix nwh raeuz gah; sowh gaenq yuq ndaw fax naeh gojndae, sowh gaenq yuq dej namh naeh gojndae, mboq miz gaeng hawj raeuz daj dix dungzbyaeg ndaej. Sowh gaenq zoah chauq naeh, daengzle nauq nauq, mboq miz gaeng rux hawj dix nwh raeuz gah.

### Dij Sen Lowg Puj Yixsowhleh

**9**<sup>1</sup> Gux yuq ndaw Jizduz daj su hax zaehzaeh, mboq zawh haxyai saek'i, daengz zaw gux daengz Minghkoan dij Sen goj hax sowh gaenq gux hax naeh zawh zaeh singjringh. <sup>2</sup>Zoq zawh baenzaqnaeh: Gux yuqraix taeuq, zaw gux zwzzwz chaej taeuq. <sup>3–4</sup>Jixzawh rux hawj puj Yixsowhleh gux, zoq zawh paenq bihnongx daj gux zaemh daeq laux ndeu ux daeuj naeh ndaej jeuq, daengz hawj gux zoah fah, daj Jizduz dungzbyaeg, gux goj venq. Dij Sen hawj paenqdix hoak lug dix, hawj paenqdix miz najta, daj paenqdix dungzdingq jijgaj mbaed jijgaj yowngh, aeu fahliah hawj paenqdix. Dix goj hawj paenqdix ruxndeq hoakzaqrawz yuq ndaw rownz dix

kvej dix, yaq goj yinq hoakzaqrawz raeuh gumx paenqdix. <sup>5</sup>Paenqdix zawh luglan Yaqboahlazhanq, Yitsaeg, Yaqgowh mawh, nganq boajnowx maz hax paenqdix daj Jizduz zawh zaemh yowngh dij goanz mawh. Raeuz ruxndeq Jizduz zawh dij Sen gvanx daengzle naeh, raeng goj hoj biangz dix daengznauq. Azmaenh!

<sup>6</sup>Puj Yixsowhleh mboq ndaej jeuq nauq, gaenqnaeh mboq zawh hax gaenq dij Sen yinq naeh mboq baenz zaeh. Su lez, luglan Yixsowhleh goj mboq zawh gaj goanz gaj ndaej hoak puj Yixsowhleh neh. <sup>7</sup>Luglan Yaqboahlazhanq goj mboq zawh gaj goanz gaj ndaej hoak luglan dix neh. Zoq baenzaq dij Sen daj Yaqboahlazhanq hax naeh: *"Luglan Yitsaeg zux ndaej hoak luglan mawz."* <sup>8</sup>Zoq zawh hax, sowh puj nganq boajnowx maz hax zawh luglan Yaqboahlazhanq naeh mboq zawh gaj goanz gaj ndaej hoak lug dij Sen, mizgaj sowh luglan dij Sen yinq aeu hawj Yaqboahlazhanq naeh zux zawh. <sup>9</sup>Gaemz kauq dij Sen yinq Yaqboahlazhanq naeh zawh hoakzaqnaeh hax: *"Bi mawq sowh zwzzawjraeuz naeh, gux daeuq dauh maz. Sazlaz miz goanz lug zaiz ux mboqyaq."* <sup>10</sup>Naengz miz lai yowngh tem, mboq zawh gaj gaenqnaeh. Su lez, doiq lug zaiz Liqbowhzaz goj zawh daeq laux dez ndeu daeuj, zoq zawh daeq puj jeq rownz raeuz Yitsaeg daeuj. <sup>11–12</sup>Gaenqraeuz ruxndeq, doiq lugsoah naeh naengzbaeq zowngx daeuj, gaenq ndae gaenqndog goj naengzbaeq hoak, dij Sen zoq daj Liqbowhzaz hax: *"Bae'naj goanz bih naeh zoah kvej hawj goanz nongx naeh"*\*

<sup>9:7</sup> Gaemz kauq naeh haeuz yuq ndaw Sw Zwz nduq 21:12.

\*<sup>9:9</sup> Zwz Nduq 18:10. \*<sup>9:11-12</sup> Zwz Nduq 25:23.

Hoakzaqnaeh hawj dij goanz ruxndeq singjringh, dij Sen lowg dij goanz zawh dix haeggaj lowg, mboq zawh hax dij goanz hoak gaeng hoj. <sup>13</sup> Daj ndaw *Sw Dij Sen* hax naeh dungzlumj: dij Sen hax:

*"Gux ngaiq Yaqgowh, gux hwnq Yixsaux."\**

<sup>14</sup> Haenx, gaenqraeuz hoakzaqrawz hax mux? Zawh dij Sen mboq tw'piang maj? Mboq rux zawh daengzhwx! <sup>15</sup> Baenzaqrawz hoakzaqnaeh hax mah? Dij Sen ndaej daj Moahciz hoakzaqnaeh hax:

"Gux zawx gumx gawz gux zoq gumx gawz,  
gux zawx zawchaej gawz gux zoq zawchaej  
gawz."\*

<sup>16</sup> Hoakzaqnaeh lez maz, dij Sen lowg dij goanz mboq zawh cholaeng dij goanz ceu, goj mboq zawh cholaeng dij goanz caqsiq hoak gaeng, zawh dij Sen zawchaej dij goanz naeh haeggaj lowg. <sup>17</sup> Ndaw *Sw Dij Sen* mai, dij Sen ndaej hoakzaqnaeh daj laux hongz Aizjih hax:

"Gux yaeuj mawz hoak hongz,  
hawj daenh leztaen sowh gaenq gux hoak bae  
now to mawz naeh, daenh zoq ruxndeq  
gux riangz baenzaqrawz,  
hawj daengz dawjfax leuz zwh gux."\*

<sup>18</sup> Hoakzaqnaeh lez maz, dij Sen zawx zawchaej gawz dix zoq zawchaej gawz, zawx hawj gawz haxnyaeb, gawz zoq haxnyaeb.

### **Dij Sen Rik Dwk Dij Goanz, Goj Zawchaej Dij Goanz**

<sup>19</sup> Hoakzaqnaeh, mawz toj rux daj gux hax: "Haenx, dix baenzaqrawz naengz hwt dij goanz mawj? Dix daz hoak gaeng gawz rux dix dix ndaej mux?" <sup>20</sup> Mawz zawh gawz oaj? Mawz zawh dij goanz naeujmax, ganz hoanx naeh dix kauq dij Sen maj? Sowh gaenq zoah chauq naeh hoakzaqrawz daj laux chauq dix naeh hax: "Mawz baenzaqrawz chauq gux baenz diauq naeh mux?" <sup>21</sup> Zoq daj puj hoak namh dungzlumj, nanhdauq dix mboq miz qenhliq aeu boaj namh ndeu chauq song aen za'hoq, aen ux biangz nyeuz, aen ux tuk nyeuz maj? <sup>22–23</sup> Dungzlumj, dij goanz goj miz song yowngh, yowngh ux daj sowh za'hoq dox taj zoah lown naeh dungzlumj, yowngh ux daj sowh za'hoq bwnz dox taj ndaej daj dij Sen zaemh miz najta naeh dungzlumj. Dij Sen rik dwk sowh za'hoq rux zoah lown naeh, daz chaenxfah paenqdix, hawj daengzle leztaen dix riangz baenzaqrawz, gaj sowh za'hoq rux miz najta naeh dix zawchaej paenqdix, cholaeng hawj paenqdix ruxndeq najta dix dwx daeux fax, dix zoq yinx zaeh zaeh, naengz mboq ndaep sowh za'hoq rux zoah lown naeh. Dix hoakzaqnaeh hoak mboq baenz maj? <sup>24</sup> Sowh za'hoq rux miz najta naeh zoq zawh gaenqraeuz sowh puj dij Sen rongx maz nowngz dix naeh, mboq zawh gaj puj Yaeuhtaiq, goj miz daengz puj yowngh ndai. <sup>25</sup> Yuq ndaw *Sw Hoahciz'az* dij Sen haeuz hoakzaqnaeh hax:

\*9:13 Maxlazjiz 1:2-3.

\*9:15 Ni Aizjih 33:19.

\*9:17 Ni Aizjih 9:16.

"Miz sowh dij goanz ux mbaednduq mboq zawh  
dij goanz gux,  
gannaeh gux rongx paenqdix hoak: 'Dij goanz  
gux.'

Miz sowh dij goanz ux mbaednduq mboq zawh  
sowh dij goanz gux nwh naeh,  
gannaeh gux rongx paenqdix hoak: 'Goanz  
gux nwh naeh.'"<sup>m</sup>

<sup>26</sup> "Koax daekgoanq ndaej yuq rawz daj paenqdix  
hax:  
'Gaenqsu mboq zawh dij goanz gux,'  
mwznaj gux zoq yuq dih rawz daj paenqdix hax:  
'Gaenqsu zawh lug laux Sen jing, laux Sen  
miz daengznauq naeh.'"<sup>n</sup>

<sup>27</sup> Laemh taeng dij goanz Yixsowhle, Yixsaiqyaq,  
goanz puj zawxkauq dij Sen naeh, yuq doqnaj  
goanzlai zoangq hiang hoakzaqnaeh hax:

"Dij goanz Yixsowhle lai lej lai daj saiz haenz  
haij dungzlumj, gaj mizgaj byai'daix dix  
ndaej jeuq naeuj.

<sup>28</sup> Baenzzaqrawz hoakzaqnaeh hax mah?  
Zaeuj toj yuq dihndin hoak sowh gaenq dix hax  
naeh,  
hawj kauq dix daengzle baenzzaeh nauq, cenq  
hoak nauq sawrik mboqyaq."<sup>o</sup>

<sup>29</sup> Goj daj Yixsaiqyaq ndaej hax yaq naeh  
dungzlumj:

"Jix mboq zawh Zaeuj gvanx bin ndaw fax naeh  
leux faenz hawj raeuz,  
gaenqraeuz daengz baenzzaq ndaw  
Soaxdozmax,  
ndaw Owhmoahlaz naeh ndowjloh."<sup>pq</sup>

### **Puj Yixsowhle Cholaeng**

### **Mboq Sinq Ej Faedlaemx**

<sup>30</sup> Hoakzaqnaeh, gaenqraeuz hoakzaqrawz hax  
mux? Sowh puj mboq zawh puj Yaeuhtaiq naeh  
mbaednduq paenqdix mboq ceu hoak sowh goanz  
gaemz hax mboq miz naeh, gaj gannaeh cholaeng  
paenqdix ciangzsinq, paenqdix goj ndaej hoak sowh  
goanz gaemz hax mboq miz naeh. <sup>31</sup> Gaj puj  
Yixsowhle zawx maengx biak fahliahawj hoakri  
byenqbaenz sowh goanz gaemz hax mboq miz naeh,  
gaj paenqdix hoak mboq taeng. <sup>32</sup> Baenzzaqrawz  
baenzzaqnaeh mux? Paenqdix zawx maengx biak  
fahliahawj hoakri byenqbaenz sowh goanz gaemz  
hax mboq miz naeh, ej mboq zawh maengx sinq  
Yezsuz byenqbaenz sowh goanz gaemz hax mboq  
miz naeh. Paenqdix zoah ndoaq tin hawj daenh  
sitndit naeh vaej laemx. <sup>33</sup> Daj ndaw *Sw Dij Sen* hax

<sup>m</sup>9:25 Gaemz kauq naeh haeuz yuq ndaw Sw Hoahciz'az 2:23.

<sup>n</sup>9:26 Gaemz kauq naeh haeuz yuq ndaw Sw Hoahciz'az 1:10.

<sup>o</sup>9:28 Gaemz kauq naeh haeuz yuq ndaw Sw Yixsaiqyaq 10:22-23.

<sup>p</sup>9:29 Gaemz kauq naeh haeuz yuq ndaw Sw Yixsaiqyaq 1:9.

<sup>q</sup>9:29 Soaxdozmax daj Owhmoahlaz zawh song aen chaenh zwzpujjeq, dij goanz song aen chaenh naeh mbowq taeuq, doaklaeng dij Sen aeu leuhhuangh daj faez ndaep paenqdix lown nauq.

naeh dungzlumj: Dij Sen aeu Yezsuz bij hoak ndoaq tin ux, dij Sen hax:

"Gux aeu ndoaq tin ux nyaengx ndaw Ciz'anz, ndoaq tin naeh rux hawj daenh sitndit, vaej daenh laemx, gaj sowh puj sinq dix naeh toj mboq rux najyaij."\*

**10**<sup>1</sup>Daengzle bihnongx aj, gux ngwz dij goanz Yixsowhle ndaej jeuq taeuq, gux how dij goanz Yixsowhle vanz dij Sen, hawj paenqdix ndaej jeuq. <sup>2</sup>Gux ruxndeq singjringh, paenqdix nowngz dij Sen ndaw zaw ndaed raedraed, gajloazej paenqdix nowngz dix mboq zawh nganqzauq kauq jing dix nowngz. <sup>3</sup>Paenqdix mboq ruxndeq hoakzawrawz hoak zux ndaej hoak sowh goanz yuq ndaw zaw dij Sen gaemz hax mboq miz naeh. Yaq paenqdix zoq haeggaj ciq hawj hoakri byenqbaenz sowh goanz gaemz hax mboq miz naeh, hoanx naeh zoq mboq biak sowh gaeng dij Sen hax rux hawj paenqdix byenqbaenz sowh goanz gaemz hax mboq miz naeh. <sup>4</sup>Ka loh fahlih naeh taeng Jizduz mowd eh, sowh puj sinq dix naeh daengzle ndaej hoak sowh puj gaemz hax mboq miz naeh.

### Gawz Rongx Zaeuj Jeuq,

### Gawz Zoq Ndaej Jeuq Mboqyaq

<sup>5</sup>Ndaw sw fahlih, Moahciz hoakzaqnaeh laiz: "Jixzawh gawz biak daengz buq fahlih bae hoak, gawz zoq ndaej zaeu."\* <sup>6</sup>Gaj diauq cholaeng

ciangzsinq yaq ndaej hoak sowh goanz gaemz hax mboq miz naeh, su lez, ndaw *Sw Dij Sen* hoakzaqnaeh hax: "*Ndaw zaw su laek hax: 'Gawz kwnj mwz ndaw fax baenz mux?'*"\* Gaemz naeh zoq zawh hax: "Gawz mwz ndaw fax zowz Jizduz daeuj baenz mux?" <sup>7</sup>Goj laek cham: "Gawz bae dihndaem<sup>r</sup> baenz mux?" Gaemz naeh zoq zawh hax: "Gawz bae dih puj tai naeh zowz Jizduz kwnj maz baenz mux?" <sup>8</sup>Su lez, ndaw *Sw Dij Sen* haeuz hoakzaqnaeh hax: "*Kauq dij Sen daj su liq mboq gvae, yuq ndaw baeg su, yuq ndaw zaw su.*" Zawh zaeh lox, sowh kauq naeh zoq zawh sowh kauq gaenqpiu laemh naeh: <sup>9</sup>Jixzawh mawz yuq doqnaej daenh baeg yinq Yezsuz zawh Zaeuj, ndaw zaw mawz goj sinq diauq dij Sen hawj dix tai yaq daeuq zaeu naeh, mawz zoq ndaej jeuq mboqyaq. <sup>10</sup>Baenzaqrawz hoakzaqnaeh hax maj? Ndaw zaw mawz sinq, dij Sen zoq hawj mawz hoak sowh goanz gaemz hax mboq miz naeh, baeg mawz yinq Yezsuz zawh Zaeuj, mawz zoq ndaej jeuq. <sup>11</sup>Ndaw *Sw Dij Sen* miz gaemz ux hoakzaqnaeh laemh Yezsuz, gaemz naeh hax: "*Sowh puj sinq dix naeh, toj mboq rux najyaij.*" <sup>12</sup>Puj Yaeuhtaiq gojndae, puj yowngh ndai gojndae, daengzle zux miz laux Zaeuj doag, baenzaqnaeh puj Yaeuhtaiq daj puj yowngh ndai mboq miz gaeng mboq dungzlumj. Gawz aeu dix hoak dij Sen maengx, dix zoq gumx gawz zaehzaeh. <sup>13</sup>Daj ndaw *Sw Dij Sen* hax naeh dungzlumj: "*Gawz aeu Zaeuj hoak dij Sen maengx, gawz toj ndaej jeuq mboqyaq.*"\*

<sup>r</sup>10:7 *Dihndaem* gaemz naeh, bwnz aeu kauq Cizlah laiz naeh zawh hoakzaqnaeh hax: *Ruz mboq miz dej naeh.*

\*9:33 Yixsaiqyaq 8:14; 28:16.

\*10:5 Liqvaeq 18:5.

\*10:6 Fahlih Ngih 30:12.

\*10:13 Yezex 2:32.

<sup>14–15</sup> Gaj gaenqsu ruxndeq, jixzawh mboq miz gawz nemz daenh bae koanx kauqfaengz Zaeuj, zoq mboq miz gawz bae koanx; mboq miz gawz bae koanx, zoq mboq miz gawz ruxnyinz; gawz mboq sanz ruxnyinz, gawz zoq mboq rux sinq Zaeuj; gawz mboq sinq Zaeuj, gawz zoq mboq rux aeu Zaeuj hoak dij Sen maengx. Baenzaqnaeh ndaw *Sw Dij Sen* hax: "*Sowh puj bae koanx kauqfaengz dij Sen naeh, roizloh din paenqdix daeq naeh yawz taeuq.*"<sup>s</sup> <sup>16</sup> Gajlej mboq zawh gaj goanz gaj zaemz kauqfaengz dij Sen, daj gaemz kauq Yixsaiqyaq ndaej hax naeh dungzlumj: "*Zaeuj aj, sowh gaeng raeuz laemh naeh, miz gawz sinq mux?*"<sup>\*</sup> <sup>17</sup> Gaj mboqgvax baenzaqrawz, fanxzaenq miz puj laemh kauqfaengz Jizduz zux miz puj ndaej biak, biak yaq zux sinq baenz.

<sup>18</sup> Gaj gux cham su gaemz ux, dij goanz mboq sanz ruxnyinz kauq dij Sen maj? Paenqdix kaenxdingq ruxnyinz lox, daj ndaw *Sw Dij Sen* hax naeh dungzlumj, sowh gaeng zoah chauq naeh,

"Hiang paenqdix leuz bae dih bae dih, kauq paenqdix leuz bae daengz dawj fax nauq."<sup>\*</sup>

<sup>19</sup> Gux daeuq cham su gaemz ux, puj Yixsowhleh mboq ruxndeq kauq dij Sen zawh hax gaeng maj? Ruxndeq lox, daih aet, dij Sen haeuz hawj Moahciz aeu kauq dix mai nyaengx ndaw sw, miz gaemz ux hoakzaqnaeh hax:

"Bae'naj gux daj sowh dij goanz mboq zawh dij goanz gux naeh dungzndae, hawj dij goanz Yixsowhleh aemqnyaeng, gux daj sowh dij goanz uajoad naeh dungzndae, daeu puj Yixsowhleh rik."<sup>\*</sup>

<sup>20</sup> Daihngih Yixsaiqyaq mboq mbu gaeng, dix yumq zawxkauq dij Sen, gaemz dij Sen hawj dix hax naeh zawh:

"Sowh puj mboq cha gux naeh, gux hawj paenqdix mex. Sowh puj mboq taeuq gux naeh, gux hawj paenqdix taen."<sup>\*</sup>

<sup>21</sup> Gaj hax taeng puj Yixsowhleh, dij Sen hax:

"Gux vaenzlinzhwnz taj paenq goanz mboq biak kauq gux, dix gux ruhruh naeh dauh maz doq gux."<sup>\*</sup>

### **Puj Yixsowhleh Naengz Miz Byai'daix Dix NdaeJ Jeuj**

**11** <sup>1</sup> Gux cham su gaemz ux, dij Sen viangh dij goanz dix ejlox? Mboq rux zawh daengzhwx! Su lez mah! Daengz gux goj zawh puj Yixsowhleh, zawh luglan Yaqboahlazhanq, zawh ngah Benqyaqminh naeh. <sup>2</sup> Dij Sen mboq viangh paenq goanz dix, paenq mbaednduq bwnz lowg hoak

<sup>s</sup>10:14-15 *Roizloh din paenqdix daeq naeh yawz taeuq*, gaemz naeh bwnz aeu kauq Cizlah laiz naeh hoakzaqnaeh hax: *Din paenqdix yawz taeuq*.

\*10:14-15 Yixsaiqyaq 52:7. \*10:16 Yixsaiqyaq 53:1. \*10:18 Lownx 19:4. \*10:19 Fahlih Ngih 32:21.

\*10:20 Yixsaiqyaq 65:1. \*10:21 Yixsaiqyaq 65:2.

dij goanz dix naeh. Gaenqsu ruxndeq ndaw *Sw Dij Sen* Yixliqyaq hoakzaqnaeh hax.<sup>†</sup> Dix yuq doqnaj dij Sen gauq puj Yixsowhleh:

<sup>3</sup>"Zaeuj aj, paenqdix kaj paenq puj  
zawxkauq mawz,  
lid le aen kuq tin aeu mbud mawz naeh,  
low gaj goanz doag gux,  
paenqdix naengz daz kaj gux." \*

<sup>4</sup>Gaj dij Sen hoakzaqrawz yaeng dix mux? Dij Sen hax:

"Gux saeh hoakri gux leux jiat tiang goanz,  
paenqdix gawz goj mboq sanz gvih Bazlih  
gah."\*

<sup>5</sup>Gannaeh goj zawh venj naeh, puj Yixsowhleh naengz miz byai'daix dix ndaej jeuq, zoq zawh sowh puj dij Sen yumq doiq paenqdix ndae, sowh puj dij Sen lowg naeh. <sup>6</sup>Zawh dij Sen yumq doiq dij goanz ndae, mboq zawh cholaeng dij goanz hoak gaeng. Jixzawh cholaeng dij goanz hoak gaeng, dij Sen zux doiq dij goanz ndae, hoanx naeh zoq mboq suanq zawh dij Sen doiq dij goanz ndae daengzhwx eh. <sup>7</sup>Zoq zawh hax, sowh gaenq puj Yixsowhleh taeuq naeh, paenqdix mboq ndaej, mizgaj sowh dij goanz dij Sen lowg naeh zux ndaej. Gvaqmaz puj ndai zoq

baenz sowh puj hax nyaeb naeh. <sup>8</sup>Daj ndaw *Sw Dij Sen* hax naeh dungzlumj:

"Dij Sen hawj to paenqdix hunz,  
hawj ta paenqdix lez mboq taen gaenq  
gaenqdix,  
hawj chu paenqdix mboq biak kauq dix,  
taengdiak vaenz naeh."\*

<sup>9</sup>Yuq ndaw *Sw Dij Sen* Daqvaeq goj ndaej hoanx naeh hax:

"Hawj zongzkaeuj paenqdix byenqbaenz  
kaeuvangh ndaek zoah paenqdix,  
byenqbaenz luh caqtaih hawj paenqdix  
doak,  
byenqbaenz sowh tin hawj paenqdix  
sitndit laemx naeh, hawj paenqdix zoah  
chaenxfah.

<sup>10</sup>Hawj ta paenqdix laz nauq, lez mboq taen.  
Hawj raengx paenqdix zwzzwz koa."\*

### **Puj Yowngh ndai Cholaeng Sinq Ej Ndaej Jeuq**

<sup>11</sup>Haenx gux daeuq cham su gaemz ux, puj Yixsowhleh sitndit rux faedlaemx daengznauq maj? Mboq rux zawh daengzhwx! Paenqdix mboq biak kauq dij Sen, dij Sen zoq jeuq puj yowngh ndai, gaj dij Sen hoakzaqnaeh zawh hawj paenqdix aemqnyaeng, hawj paenqdix ruxndeq ceu dij Sen.

<sup>†</sup>**11:2** *Yixliqyaq* zawh zwzpujjeq goanz puj zawxkauq dij Sen ux. Lez *Sw Laux hongz Bwnz Daih Aet Naeh*, *Sw Laux hongz Bwnz Daih Ngih Naeh*.

\* **11:3** *Laux Hongz Aet* 19:10; 14.   \* **11:4** *Laux Hongz Aet* 19:18.   \* **11:8** *Fahlih Ngih* 29:4; *Yixsaiqyaq* 29:10.

\* **11:10** *Lownx* 69:22-23.

<sup>12</sup>Daengzgaj puj Yixsowhleh mboq biak kauq dij Sen, dij goanz dihndin naengz cholaeng gaenqnaeh miz goanz raengh taeuq ndaej jeuq, daengzgaj puj Yixsowhleh faedlaemx, puj yowngh ndai naengz cholaeng gaenqnaeh ndaej daj dij Sen dungzndae, venjnaeh, taeng zwz puj Yixsowhleh sowh puj ndaej jeuq naeh to'goanz daem zwzrawz, puj yowngh ndai zoq cholaeng paenqdix ndaej ndae nyeuz gajrawz lai oah!

<sup>13</sup>Gannaeh, gux daj puj yowngh ndai hax, gux zawh dij goanz zawxkauq Yezsuz, zawh aeu kauqfaengz Yezsuz laemh dwk su, baenzzaqnaeh gux lez ndaej qix najgaengx gux. <sup>14</sup>Gux hoakzaqnaeh zawh zawx hawj puj Yixsowhleh gux aemqnyaeng, ruxndeq ceu dij Sen, hoanx naeh hawj paenqdix mbangj goanz ndaej jeuq. <sup>15</sup>Daengzgaj puj Yixsowhleh zoah dij Sen viangh, puj yowngh ndai zoq ndaej daj dij Sen dungzndae, venjnaeh, jixzawh puj Yixsowhleh yumq ndaej hawj dij Sen zaemz, paenqdix toj daeuq ndaej aen mingh mboqyaq. <sup>16</sup>Jixzawh ndoaq aeu mbud daekgoanq naeh zawh gaenq saw, daengz ndoaq zoq zawh gaenq saw. Jixzawh laeg maex saw, ngah dix goj saw.

<sup>17</sup>Puj Yaeuhtaiq zoq baenzzaq maeghit rownz naeh, puj yowngh ndai su zoq baenzzaq maeghit bo naeh. Jixzawh maeghit rownz miz jij ngah ux zoah daet ni, hawj mawz sowh ngah maeghit bo naeh ndaej jiad mwz, zaemh ndaej jin naemxpwnq sowh laeg maex maeghit rownz chowx maz naeh, <sup>18</sup>mawz goj laek bongz mwz doq sowh ngah gaeuq naeh oaj. Jixzawh mawz baegbongz, mawz hoj ruxndeq, mboq zawh mawz fowz laeg, zawh laeg

fowz mawz. <sup>19</sup>Jixzawh mawz baegbongz, mawz rux hoakzaqnaeh hax: "Le ngah gaeng naeh zoah daet ni yah, zawh cholaeng hawj lajboh ndaej rangh mwz." <sup>20</sup>Gaemz mawz hax naeh zawh zaeh, zawh cholaeng paenqdix mboq sinq, paenqdix zoq zoah daet ni. Cholaeng mawz sinq, mawz zoq in ndaej vwnx. Gajlej laek baegbongz, yauq ruxndeq mbu dij Sen oaj. <sup>21</sup>Daengz sowh ngah mbaednduq naeh dij Sen naengz cez ndaej taemj, dij Sen goj cez ndaej taemj mawz. <sup>22</sup>Caqsiq hem, dij Sen hax zawkau goj zawkau, hax yeanh goj yeanh, baenzzaq dix doiq sowh puj faedlaemx naeh yeanh taeuq, doiq mawz zawkau taeuq naeh, gaj jixzawh mawz mboq goq goq maengx dij Sen, mboq maengx laux yumq doiq su zawkau naeh, mawz goj zoah daet mboqyaq. <sup>23</sup>Gannaeh paenqdix mboq sinq, gaj jixzawh mwznaj paenqdix sinq, paenqdix goj daeuq ndaej aeu mwz sup. Dij Sen rux hawj paenqdix daeuq aeu sup mwz baenz. <sup>24</sup>Mawz daj sowh ngah daeq maeghit bo taemj daeuj naeh dungzlumj, maeghit bo, ngah dix naengz rux aeu jiad mwz go maeghit rownz baenz, haenx, sowh ngah mbaednduq bwnz miz naeh, mboq gajfa aeu sup mwz ngaih nyeuz maj?

### **Mwznaj Rownz Yixsowhleh**

#### **Daengz Rownz Rux NdaeJ Jeuq**

<sup>25</sup>Daengzle bihnongx aj, gux zawx hawj su ruxndeq diauq ux, diauq naeh mbaednduq damz mboq miz gawz ruxndeq, gannaeh gux haxdoq su, hawj su ruxndeq, yaj gaenqsu faeklahi hoakri gvai zawzmboqraeuh. Diauq naeh zoq zawh, puj Yixsowhleh mbangj goanz hax nyaeb, zawh hawj

puj yowngh ndai to'goanz daem nauq goanq.  
<sup>26</sup> Taeng zwz naeh rownz Yixsowhleh daengz rownz  
 rux ndaej jeuq mboqyaq, daj ndaw *Sw Dij Sen* hax  
 naeh dungzlumj:

"Zaeuj jeuq dij goanz naeh daeq ndaw Ciz'anz  
 daeuj,<sup>u</sup>  
 hawj rownz Yaqgowh hoak loang dij Sen gah  
 eh."

<sup>27</sup> Yaq dij Sen hax:

"Gaenqnaeh zoq zawh aen dungzdingq gux daj  
 paenqdix dungzdingq naeh."\*

Daeuq hax:

"Taeng zwz naeh, gux yangq sowh gaenq  
 paenqdix hoak loang naeh."\*

<sup>28</sup> Laemh taeng kauq faengz, cholaeng hawj puj  
 yowngh ndai su rux ndaej jeuq, puj Yixsowhleh  
 baenz sowh puj daj dij Sen hoak dangqbaih naeh.  
 Gaj laemh taeng diauq dij Sen lowg dij goanz naeh,  
 dij Sen cholaeng puj jeq rownz paenqdix zoq naengz  
 nwh paenqdix. <sup>29</sup> Baenzaqrawz mah? Dij Sen ndaej  
 aeu gaeng hawj gawz daj lowg gawz, gaenqnaeh  
 toj mboq rux byenq. <sup>30</sup> Gaenqsu koax daekgoanq  
 mboq biak kauq dij Sen, gaj cholaeng gannaeh  
 puj Yaeuhtaiq mboq biak kauq dij Sen, gannaeh  
 gaenq hoakloang su zoq ndaej yangq. <sup>31</sup> Dungzlumj,  
 daengz gannaeh puj Yaeuhtaiq mboq biak kauq dij

Sen, gaj cholaeng gaenqsu ndaej yangq, paenqdix  
 goj ndaej yangq baenz. <sup>32</sup> Dij Sen hawj daengzle dij  
 goanz mboq miz gawz biak kauq dix hoak baenz  
 nauq, zawh cholaeng hawj dix rux yangq sowh  
 gaenq dij goanz hoak loang naeh baenz.

<sup>33</sup> Dij Sen doiq dij goanz ndae zaeh zaeh loh, aen  
 gvai dix daj aen dongx dix ndaek zaehzaeh loh! Dix  
 hoak gaeng nanh ndaej am taeuq, dix hoakzaqrawz  
 hoak nanh ndaej ruxndeq taeuq!

<sup>34</sup> "Gawz ruxndeq zaw Zaeuj mux?

Gawz naengz rux nyeuz dix, saeh dix daz  
 raengraeng mux?"\*

<sup>35</sup> "Gawz aeu gaeng hawj dix daekgoanq, ej hawj  
 dix baenz boiz mux?"\*

<sup>36</sup> Gaeng goj zawh dix chauq, gaeng goj  
 maengx dix, gaeng goj zawh gaenq dix.

Ngwz gawz goj biangz gaj dij Sen, taengdiak  
 daengznauq. *Azmaenh!*

### Yuq Ndaw Jizduz Hoak Goanz Mawq

**12** <sup>1</sup> Daengzle bihnongx aj, taeng'hax dij  
 Sen hoakzaqnaeh zawchaej gaenqraeuz  
 mbaedtownq-mbaedmawq, venjnaeh gux chownq  
 gaenqsu hawj hoakri saw, hawj hoakri baenz sowh  
 goanz dij Sen zaemz naeh, aeu zohgoanz hoakri  
 mbud hawj dij Sen. Gaenqsu hoj hoakzaqnaeh kvej  
 hawj dij Sen. <sup>2</sup> Laek zaep sai'zaw dij goanz dihndin  
 hoak, yauq hawj dij Sen aeu zaw mawq hawj su,  
 hawj su byenqbaenz goanz mawq, hoakzaqnaeh

<sup>u</sup>11:26 *Ciz'anz* zoq zawh hax Yezluqsaxlaengx, raj hax dih dij Sen yuq naeh.

\*11:27 Yixsaiqyaq 59:20-21.

\*11:27 Yixsaiqyaq 27:9.

\*11:34 Yixsaiqyaq 40:13.

\*11:35 Yezboah 41:11.



gaenqsu zux rux jem sowh gaenq kaeujzaw dij Sen naeh, zoq zawh jem sowh rawz zawh gaenq ndae, zawh sowh gaenq gaemz hax mboq miz naeh, zawh sowh gaenq dij Sen zaemz naeh.

<sup>3</sup> Dij Sen yumq lowg gux hoak dij goanz zawxkauq Yezsuz, baenznaeh gux daj gaenqsu daengzle hax: Laek aeu hoakri hoak dwx gvaq, baenz nganqzauq dij Sen hawj hoakri mizzaw baenzzaqrawz yaq daeg hoakri ndae'ndowq. <sup>4</sup> Daj ndang raeuz miz jijgaj yowngh dungzlumj, yowngh ux lej aeu hoak zaq ux. <sup>5</sup> Paenqraeuz goj zawh dungzlumj, hax lej hax paenq raeuz miz goanz lai yaengh lai, gaj yuq ndaw Jizduz paenqraeuz daengzle dungzrangh baenz ndang doag. <sup>6</sup> Dij Sen yumq hawj raeuz goanz ux lej rux yowngh ux. Sowh goanz dix hawj rux zawxkauq dix naeh, sowh goanz naeh zoq baenz sinq taeng koaq rawz zoq laemh ndaek gajrawz. <sup>7</sup> Sowh goanz dix hawj rux kvej hawj daenh naeh, zoq baenz zawdoag kvej. Sowh goanz dix hawj rux zau daenh naeh, zoq baenz zawdoag zau. <sup>8</sup> Sowh goanz dix hawj rux byongz daenh naeh, zoq baenz zawdoag byongz daenh. Sowh goanz dix hawj ngaiq aeu gaeng hawj daenh naeh, zoq baenz mizzaw singjringh hawj. Sowh goanz dix hawj gvanx dij goanz zauqhoiq naeh, zoq baenz caqsiq gvanx. Sowh goanz dix hawj rux zawchaej daenh, zoq baenz caqsiq hoak naj runghchaeg ux.

<sup>9</sup> Nwh daenh zoq baenz nwh zaeh, laek hoak sowh hoak doi naeh. Yauq hwnq gaenqndog, zaemz gaenq ndae. <sup>10</sup> Yauq hoakzaq bihnongx ndiang naeh dungznwh. Goanz lej aeu goanz hoak biangz, goanz lej jinq goanz. <sup>11</sup> Yauq kvej hawj dij Sen naeuz

chaek ux, laek zanx, ndaw zaw ndaed raedraed. <sup>12</sup> Yauq ngwz taeng vaenz daj dij Sen zaemh yuq zaeh naeh, menq taj menq faengz, miz aen nanq goj yauq gaemx mwz naj, zwzzwz daj dij Sen hax kauq. <sup>13</sup> Sowh dij goanz sinq Zaeuj naeh jixzawh gawz gajraeng mboq doh, zoq baenz saeh dix. Yauq venq hawj puj dih gvae sowh puj gvaqloh naeh maz rownz hoakri ced. <sup>14</sup> Sowh puj vazkuz su naeh, goj yauq vanz dij Sen gumx paenqdix, laek vanz dij Sen fah paenqdix. <sup>15</sup> Gawz faengz zoq daj dix zaemh faengz, gawz haej zoq hoak bownh dix haej. <sup>16</sup> Hoakgoanz laek lez najta, laek baegbongz, baenz daj puj luk bae'dauh. Laek faeklahi hoakri gvai zawzmbokraeuh. <sup>17</sup> Gawz hoak mbowq dwk mawz, mawz goj laek hoak mbowq boiz dix. Caqsiq bae hoak sowh saeh goanzlai hax hoj naeh. <sup>18</sup> Jixzawh baenz ndaej, yauq caqsiq hoak sowh gaenq hawj hoakri daj puj ndai dungzndae naeh. <sup>19</sup> Daengzle bihnongx aj, ndaw *Sw Dij Sen* hoakzaqnaeh hax: "Zaeuj hax: 'Zawh gux chaenxfah sowh puj hoak mbowq naeh, gawz hoakzaqrawz hoak gux zoq hoakzaqrawz hoak boiz dix.'"\* Baenzzaqnaeh laek haeggaj hoak mbowq boiz sowh puj hoak mbowq dwk mawz naeh, hawj dij Sen haeggaj rikdwx chaenxfah dix. <sup>20</sup> Mboq zawh gaj hoakzaqnaeh hoak, naengz baenz hoakzaqnaeh tem, zoq zawh:

"Jixzawh sowh puj daj mawz hoak dangqbaih  
naeh dongxyaeg,  
mawz aeu gaenqjin hawj dix jin oaj.  
Jixzawh dix yaegnaemx, aeu naemx hawj dix  
ndut oaj.

\*12:19 Fahlih Ngih 32:35.

Mawz hoakzaqnaeh hoak zoq zawh aeu  
tanqfaez daep mwz ndaw to dix."<sup>vw</sup>

<sup>21</sup> Laek hawj gaenqndog bex, yauq hoak saeh ndae  
bex gaenqndog.

### Biak Kauq Puj saeq

**13** <sup>1</sup> Mboq miz saek yowngh saeq mboq zawh  
dij Sen hawj hoak, sowh saeq rawz goj  
zawh dij Sen hawj hoak. Baenzzaqnaeh, gawz goj  
baenz biak puj saeq. <sup>2</sup> Gawz dix puj saeq, gawz  
zoq zawh dix sowh gaenq dij Sen hoak naeh. Gawz  
dix gawz zoq haeggaj zoah saenxpanq. <sup>3</sup> Puj saeq  
mboq zawh hawj sowh puj hoak saeh ndae naeh  
mbu, zawh hawj sowh puj hoak mbowq naeh mbu.  
Mawz zawx mboq mbu puj saeq vah? Nanghgaj  
mawz hoak saeh ndae, mawz zoq ndaej hawj dix  
haenh. <sup>4</sup> Baenzzaqrawz mah? Puj saeq zawh puj  
koij dij Sen, dij Sen hawj miz puj saeq zawh doiq  
mawz ndae. Gaj jixzawh mawz hoak mbowq, mawz  
zoq baenz mbu puj saeq. Mawz ruxndeq, puj saeq  
tw remz mboq zawh tw daengzhwx, dix zawh puj  
koij dij Sen, zawh how dij Sen chaenxfah sowh  
puj hoak mbowq naeh. <sup>5</sup> Baenzzaqnaeh, gaenqsu  
baenz biak kauq puj saeq, mboq zawh cholaeng gaj

mbu chaenxfah, goj zawh cholaeng ndaw zaw su  
haeuz ruxndeq biak kauq puj saeq zawh hohdih.

<sup>6</sup> Puj saeq zawh dij Sen hawj paenqdix kvej hawj  
daengzle, paenqdix zoanzmaenh hoak gaenqnaeh.  
Baenzzaqnaeh, gaenqsu kae coiq oaj. <sup>7</sup> Gaenqraeuz  
gawz goj daj puj baznij dungzlumj, baz gaeng zoq  
baenz boiz gaeng, hoj aeu kaeuj hawj zoq aeu kaeuj  
hawj, hoj kae coiq zoq kae coiq; hoj mbu gawz zoq  
mbu gawz; hoj zaenzzungq gawz zoq zaenzzungq  
gawz.

### Nwh Daenh Daj Nwh Hoakri Dungzlumj

<sup>8</sup> Laek baznij gaeng, gajlej daengz mawz boiznij  
daengzle nauq, mawz goj naengzgaj baznij diauq  
ux, zoq zawh nwh puj ndai. Baenzzaqrawz mah?  
Nwh puj ndai, zoq zawh biak daengz buq fahlih.

<sup>9</sup> Fahlih hax: "Hoak po, hoak mez, mboq jinx naengh  
puj ndai, mboq jinx luanq kaj goanz, mboq jinx  
hoaklaek, mboq jinx ceu gaenq daenh."<sup>\*</sup> Naengz  
miz tem, saengq gaeng goj zawh yuq ndaw gaemz  
naeh "Nwh daenh daj nwh hoakri dungzlumj."<sup>x</sup>

<sup>10</sup> Nwh daenh zoq mboq rux hoak mbowq dwk daenh  
mbyoh, baenznaeh nwh zoq zawh biak daengz buq  
fahlih.

<sup>v</sup>12:20 Mawz hoakzaqnaeh hoak zoq zawh aeu tanqfaez daep mwz ndaw to dix. Ingj rux zawh hax: Mawz hoakzaqnaeh hoak dix zoq laizlom.

<sup>w</sup>12:20 Gaemz kauq naeh haeuz yuq ndaw Sw Kauq Gvai 25:21-22.

<sup>x</sup>13:9 Gaemz kauq naeh haeuz yuq ndaw Sw Liqvaeq 19:18. Goj yuq ndaw Sw Maxtaiq Laiz Kauqfaengz Yezsuz 5:43; 19:19; 23:39; Sw Maxkowh Laiz Kauqfaengz Yezsuz 12:31; Sw Luhzaz Laiz Kauqfaengz Yezsuz 10:27.

<sup>\*</sup>13:9 Ni Aizjih 20:13-17; Fahlih Ngih 5:17-19; 21.

**Laek Hoak Sowh Saeh Yuq Dih  
Ndaem Hoak Naeh, Hoak Sowh  
Saeh Yuq Dih Rungh Hoak Naeh**

<sup>11</sup> Naengz miz tem, gaenqsu ruxndeq, gannaeh mboq zawh gau noanzvaiz zawh gau hoj ruxndownq yah; gaenqraeuz liq vaenz ndaej jeuq naeh, gannaeh haeuz zawj nyeuz zwz hem sinq naeh. <sup>12</sup> Zang'hwnz haeuz zaekgaj gvaq, zaekgaj taeng fax rungh yah. Baenzaqnaeh gaenqraeuz baenz viangh sowh saeh yuq dih ndaem naeh, baenz gaem maeg remz rungh chaeg naeh, <sup>13</sup> daeq ka loh rungh naeh ndae'ndowq. Mboq jinx daj goanzlai zaemh yuq luanq hoak luanq bae daj jin laeuj imq, mboq jinx ngaiq daj gawz zaemh yuq zoq daj gawz zaemh yuq, hoakzaq doiho naeh; mboq jinx dungzjeng daj ta'ndaem daenh. <sup>14</sup> Yauq hoakzaq nungh ndangnungh mawq naeh zaep yaiz Zaeuj raeuz Yezsuz Jizduz hoak, laek jizzaz boajnowx hoakri nwh hoakrawz zoq hoakrawz.

**Mboq Jinx Pyaemj Bihnongx**

**14** <sup>1</sup> Sowh puj sinq dij Sen gaj ndaw zaw naengz mboq gong nauq naeh, gaenqsu goj laek byaeg paenqdix oaj, daengz paenqdix nwh daj gaenqsu mboq dungzlumj, gaenqsu goj laek daj paenqdix dungzjinj oaj. <sup>2</sup> Gaenqraeuz mbangj goanz hax gaeng goj hawj jin, gaj sowh puj ndaw zaw naengz mboq gong nauq naeh hax mboq jinx jin nowx. <sup>3</sup> Sowh puj jin naeh mboq jinx lezmboqqix sowh puj mboq jin naeh. Sowh puj mboq jin naeh goj mboq jinx pyaemj sowh puj jin naeh. Baenzaqrawz mah? Sowh puj jin naeh, dij Sen goj haeuz zaemz

paenqdix, aeu paenqdix hoak dij goanz dix eh. <sup>4</sup> Mawz zawh gawz ah? Ganz pyaemj puj koj daenh maj? Dix in vwnx gojndae, faedlaemx gojndae, haeggaj miz zaeuj dix gvanx. Gaj zaeuj toj hawj dix in vwnx mboqyaq, baenzaqnaeh dix toj in vwnx mboqyaq.

<sup>5</sup> Mbangj goanz hax vaenznaeh vaenznaeh hoj gaem, gaj mbangj goanz hax mboq gaem gojndaej; gaj hax rawz goj baenz goanz dangq goanz haeggaj jehdingq ndae'ndowq. <sup>6</sup> Puj gaem goj zawh cholaeng biangz Zaeuj zux gaem. Sowh puj gaeng goj jin naeh, dix mbaiq dij Sen, baenzaqnaeh dix jin, dix zoq zawh biangz Zaeuj. Sowh puj mboq hawj hoakri jin gaenqnaeh gaenqnaeh, dix goj mbaiq dij Sen, baenzaqnaeh dix mboq hawj hoakri jin gaenqnaeh gaenqnaeh goj zawh biangz Zaeuj. <sup>7</sup> Gaenqraeuz mboq miz gawz cho hoakri zaeu, goj mboq miz gawz cho hoakri tai. <sup>8</sup> Gaenqraeuz zaeu zawh cho Zaeuj zaeu, gaenqraeuz tai zawh cho Zaeuj tai. Baenzaqnaeh gaenqraeuz tai gojndae, zaeu gojndae, goj suhyih dij goanz Zaeuj. <sup>9</sup> Baenzaqnaeh, Jizduz tai, yaq daeuq zaeu, zawh cholaeng hoak Zaeuj puj tai daj Zaeuj puj zaeu. <sup>10</sup> Mawz baenzaqrawz pyaemj bihnongx ndaw zauqhoiq mux? Mawz baenzaqrawz lezmboqqix paenqdix mux? Unj, gaenqraeuz gawz goj baenz in doqnaj dij Sen zoah dij Sen saenxpanq mbezneh. <sup>11</sup> Ndaw *Sw Dij Sen* hax:

"Zaeuj hax: 'Gux pinh aen mingh daengznauq  
gux naeh hax zachzaeh,  
to'kaeuq gawz goj toj gvih maz doq gux,

baeg gawz goj toj yinq gux zawh dij Sen.’”y

<sup>12</sup> Hoakzaqnaeh lez maz, dij Sen toj daj gaenqraeuz hoak goanz hoak goanz soanqzangq mboqyaq.

### **Mboq Jinx Hoak Sowh Saeh Hawj Bihongx Ndaw Zauqhoiq Faedlaemx Naeh**

<sup>13</sup> Baenzaqnaeh, gaenqraeuz mboq baenz goanz lej pyaemj goanz, mizgaj luq hoakzaqnaeh nwh, zoq zawh nwh hoakrawz goj mboq hoak sowh gaenq hawj bihongx ndaw zauqhoiq sitndit daj faedlaemx naeh. <sup>14</sup> Yuq ndaw Zaeuj raeuz Yezsuz, gannaeh gux ruxndeq singjringh sowh gaenq aeu hoak gaenqjin naeh mboq miz gaeng mboq saw; gajlej jixzawh gawz hax gaenq rawz zawh gaenq mboq saw, doiq dix maz hax gaenq rawz zoq zawh gaenq mboq saw zaeh eh. <sup>15</sup> Jixzawh mawz jin gaeng rux hawj bihongx ndaw zauqhoiq ndaw zaw dij, mawz hoakzaqnaeh zoq zawh mboq nwh daenh. Jixzawh mawz jin sowh rawz rux haiq zoah sowh goanz Jizduz haeuz how dix tai naeh, zoq mboq jinx jin sowh rawz. <sup>16</sup> Baenzaqnaeh, sowh saeh mawz lez maz hoak goj hoj naeh, laek hoak hawj daenh lezhwnq. <sup>17</sup> Baenzaqrawz mah? Goh dij Sen daj jin gaeng mboq miz goanzciq, zawh daj le gaenqnaeh miz goanzciq, zoq zawh maengx Minghkoan dij Sen hoak sowh gaenq dij Sen zaemz naeh loaj, daj daenh dungzndae loaj, ndaw zaw faengz loaj. <sup>18</sup> Gawz hoakzaqnaeh kvej hawj Jizduz, dij Sen zoq zaemz dix, dij goanz zoq haenh dix. <sup>19</sup> Baenzaqnaeh, gaenqraeuz baenz caqsiq hoak sowh saeh hawj daengzle dungzndae naeh daj sowh

saeh zau zoah puj ndai naeh. <sup>20</sup> Mboq jinx cholaeng gaenqjin ej vaih najgaengx dij Sen, zoq zawh hax mboq jinx cholaeng gaenqjin ej haiq zoah bihongx ndaw zauqhoiq. Gaenqjin gaeng goj zawh gaenq saw, gaj jixzawh jin sowh rawz rux hawj daenh faedlaemx, mawz goj naengz jin mawz zoq zawh hoak loang. <sup>21</sup> Jixzawh sowh saeh rawz rux hawj bihongx ndaw zauqhoiq faedlaemx, baenzaq jin nowx loaj, ndut laeuj loaj, yowngh ndai loaj naeh, yaq mawz mboq hoak, mawz zoq zawh hoak hoj eh. <sup>22</sup> Mawz hax hoj mawz zoq haeggaj yuq doqnaq dij Sen hoak mwz naj yaq. Gawz hoak sowh gaenq hoakri hax hoj naeh, yaq goj mboq soangqzaw, dix zoq faengz yah. <sup>23</sup> Jixzawh gawz doiq sowh gaenqjin ux, mboq ruxndeq hoj mboq hoj jin, gaj dix jin, dij Sen zoq hax dix zawh hoak loang. Unj, cinh hoakri haeuz ndaej hax mboq jinx jin dix naengz daeuq jin. Jixzawh gawz haeuz ndaej hax mboq jinx hoak sowh rawz, gaj doaklaeng dix ej daeuq bae hoak, dix zoq zawh hoak loang.

### **Gaenqraeuz Gaj Goanz Gaj Baenz Nwh Taeng Puj ndai Daekgoanq**

**15** <sup>1</sup> Sowh puj sinq dij Sen gaj ndaw zaw naengz mboq gong nauq naeh, gaenqraeuz sowh puj ndaw zaw gong nyeuz naeh hoj zaemh nwh laeng paenqdix, laek nwh gaj hoakri. <sup>2</sup> Gaenqraeuz gaj goanz gaj baenz nwh taeng puj ndai daekgoanq, hawj paenqdix yuqndae, zau zoah paenqdix. <sup>3</sup> Daengz Jizduz goj mboq zawh nwh gaj hoakri, daj ndaw *Sw Dij Sen* hax naeh dungzlumj:

"Zaeuj aj, gawz mang mawz zoq zawh mang  
gux."<sup>z</sup>

<sup>4</sup> Sowh kauq zwzndowj laiz nyaengx ndaw *Sw Dij Sen* naeh zawh cholaeng aeu zau raeuz, hawj raeuz gaemx mwznaj, hawj sowh kauq ndaw *Sw Dij Sen* naeh byongz raeuz, hoanx naeh gaenqraeuz zoq ngwz taeng vaenz daj dij Sen zaemh yuq zaeh naeh.

<sup>5</sup> Ngwz dij Sen laux byongz dij goanz, laux hawj dij goanz kaemjzaw gaemx mwznaj naeh hawj gaenqsu hoak zawdoag, zaep Jizduz Yezsuz hoak, <sup>6</sup> hawj gaenqsu daengzle hoak zawdoag biangz dij Sen, zoq zawh biangz Dez Yezsuz Jizduz dez zaeuj raeuz naeh. <sup>7</sup> Baenzaqnaeh, gaenqsu goj goanz lej zaemz goanz, daj Jizduz zaemz gaenqsu dungzlumj, hawj daenh leztaen najta dij Sen.

<sup>8</sup> Gux haxdoq su, Jizduz cholaeng hawj dij goanz ruxndeq kauq dij Sen zawh zaeh, dix zoq hoak puj kojij puj Yaeuhtaiq, dix hawj sowh gaenq dij Sen yinq puj jeq puj Yaeuhtaiq naeh baenzaeah, <sup>9</sup> goj hawj puj yowngh ndai leztaen dij Sen yangq gaenq hoakloang dij goanz, zoq biangz dij Sen. Daj ndaw *Sw Dij Sen* hax naeh dungzlumj, ndaw *Sw Dij Sen* hax:

"Baenzaqnaeh, gux yuq doqnaj puj yowngh ndai  
haenh mawz,  
lownx biangz zwh mawz."<sup>a</sup>

<sup>10</sup> Ndaw *Sw Dij Sen* goj hoakzaqnaeh hax:

"Puj yowngh ndai aj,  
gaenqsu hoj daj dij goanz dij Sen zaemh  
faengz."<sup>b</sup>

<sup>11</sup> Ndaw *Sw Dij Sen* goj hoakzaqnaeh hax:

"Puj yowngh ndai aj, gaenqsu daengzle biangz  
Zaeuj oaj!  
Dij goanz dawj fax aj, gaenqsu daengzle  
biangz dij Sen oaj!"<sup>c</sup>

<sup>12</sup> Ndaw *Sw Yixsaiqyaq* goj hoakzaqnaeh hax:

"Mwznaj goanqlaeg Yezciz naeh sowd maz go  
ux, go naeh gvanx puj yowngh ndai, <sup>d</sup>  
puj yowngh ndai ngwz taeng vaenz daj dix  
zaemh yuq naeh."<sup>e</sup>

<sup>13</sup> Zawh dij Sen hawj dij goanz ngwz taeng vaenz daj dix zaemh yuq naeh, ngwz dix hawj su gaj laeng gaj sinq dix, gaj laeng gaj faengz, gaj laeng gaj yuqvangq, hoanx naeh gaenqsu cho'mbaiq doakriangz Minghkoan dij Sen zoq gajfa ngwz taeng vaenz naeh.

<sup>z</sup>15:3 Gaemz kauq naeh haeuz yuq ndaw *Sw Lownx* 69:9.

<sup>a</sup>15:9 Gaemz kauq naeh haeuz yuq ndaw *Sw Lownx* 18:49.

<sup>b</sup>15:10 Gaemz kauq naeh haeuz yuq ndaw *Sw Fahlih Daih Ngih* 32:43.

<sup>c</sup>15:11 Gaemz kauq naeh haeuz yuq ndaw *Sw Lownx* 117:1.

<sup>d</sup>15:12 Yezciz zawh dez Daqvaeq goanz zwz puj jeq hoak hongz naeh. *Goanqlaeg Yezciz* zawh hax: "changz rownz Yezciz naeh." Go gaengnaeh zoq zawh hax Yezsuz, zawh hax Yezsuz zawh daeq ngah Daqvaeq naeh daeuj.

<sup>e</sup>15:12 Gaemz kauq naeh haeuz yuq ndaw *Sw Yixsaiqyaq* 11:1, 10.

**Bauxloah Mboq Yuq Sowh Dih Daenh  
Haeuz Koanx Kauqfaengz Jizduz Yaq  
Naeh Koanx Kauqfaengz Jizduz**

<sup>14</sup>Daengzle bihnongx gux aj, hoakri gux lej dauq ruxndeq gaenqsu zawndae, ruxndeq gaenqsu ruxndeq kauq dij Sen lai taeuq, ruxndeq gaenqsu ruxndeq dungzchownq. <sup>15</sup>Gaj sowh gux laiz hawj su naeh zawh miz i sw h ux, miz i chung mboq yawz ux, zawh cholaeng saengq su mbaed mawq. Dij Sen yumq lowg gux, <sup>16</sup>hawj hoak puj koanx kauqfaengz dix, hawj gux daj goanz puj mbud dij Sen ux dungzlumj. Gux koanx kauqfaengz dix zawh hawj puj yowngh ndai ruxnyinz. Gux hoakzaqnaeh hoak zawh zawx taen Minghkoan dij Sen hawj paenqdix byenqbaenz puj saw. Hoakzaqnaeh dij Sen zoq zaemz paenqdix, daj zaemz sowh gaenq aeu mbud dix naeh dungzlumj. <sup>17</sup>Baenzaqnaeh, laemh taeng sowh saeh dij Sen naeh, yuq ndaw Jizduz Yezsuz gux miznaj taeuq. <sup>18–19</sup>Mizgaj sowh saeh Jizduz hawj gux hoak naeh daj hawj gux hax naeh, gvaqmaz gux mboq ganz laemh gaeng, dix aeu doakriangz hawj gux hoak sowh saeh saenh yaengh saenh naeh, goj aeu doakriangz Minghkoan dij Sen hawj gux, hawj gux yaix puj yowngh ndai biak kauq dij Sen. Gux zoq daeq Yezluqsaxlaengx chaenh bae taengdiak mbanj Yixliqlixgux, bae dih bae dih koanx kauqfaengz dix. <sup>20</sup>Daeq zwz nduq maz, sai'zaw gux haeuz hoakzaqnaeh nwh, mboq yuq sowh dih daenh haeuz koanx kauqfaengz Jizduz yaq naeh koanx kauqfaengz Jizduz, hoanx naeh hawj najgaengx gux

yuq rawz goj zawh gux qiz daekgoanq. <sup>21</sup>Daj ndaw *Sw Dij Sen* hax naeh dungzlumj:

"Sowh dih naengz mboq sanz miz gawz bae koanx dix naeh,  
paenqdix rux ndaej taen mboqyaq,  
sowh puj mboq sanz ruxnyinz dix naeh,  
paenqdix ruxndeq mboqyaq."<sup>f</sup>

**Bauxloah Daz Bae Loahmax**

<sup>22–23</sup>Gux baenz bae sowh dih mboq miz dij goanz koanx kauqfaengz naeh koanx, baenzaqnaeh hax lej hax le bi zawjraeuz gux zawx bae zawj su taeuq, gaj taeng gannaeh naengz gaj bae mboq chuh. Gajlej mbaenqnaeh mbanj zawj gux naeh mboq miz dih rawz baenz hawj gux bae koanx kauqfaengz dij Sen tem eh. <sup>24</sup>Gux ngwz bae mbanj Cizbanzyah gvaq zoah dih zawj su zwzrawz, ndaej taen gaenqsu, ndaej daj su laemh kauq, hawj gux ndaej daj su zaemh yuq saek ndauj, yaq goj ngwz su qensowj rizrowh saeh gux laeng, hawj gux bae dih gaengnaeh baenz. <sup>25–26</sup>Gaj gannaeh, gux baenz mwz Yezluqsaxlaengx chaenh. Bihongx ndaw mbanj Maxqihdunq daj bihnongx ndaw mbanj Yaqgaizyaq zawx aeu bih jenz ux hawj dij goanz dij Sen sowh puj yuq ndaw Yezluqsaxlaengx, sowh puj baenzluk naeh, baenzaqnaeh gannaeh gux baenz tw bih jenz naeh mwz hawj paenqdix. <sup>27</sup>Gaenqnaeh hax lej hax zawh paenqdix haeggaj venq, gaj paenqdix goj daj baznij puj Yaeuhtaiq dungzlumj. Baenzaqrawz mah? Paenqdix mboq zawh puj Yaeuhtaiq, paenqdix ndaej sowh gaenq minghkoan dij Sen aeu hawj naeh zawh

<sup>f</sup>15:21 Gaemz kauq naeh haeuz yuq ndaw *Sw Yixsaiqyaq* 52:15.

ndaej laeng puj Yaeuhtaiq, paenqdix zoq daj baznij puj Yaeuhtaiq dungzlumj. Baenzaqnaeh paenqdix aeu ngaenzjenz dihndin baen puj Yaeuhtaiq, hoak gaenq boiznij hoakri, gaenq naeh zawh hoh dih. <sup>28</sup>Taj gux hoak gaenqnaeh ndae, tw bih jenz naeh mwz hawj paenqdix, gux zoq gvaq dih su, bae mbanj Cizbanzyah. <sup>29</sup>Gux ruxndeq, gux bae zawj su zwzrawz, Jizduz toj gumx raeuz mboqyaq.

<sup>30</sup>Daengzle bihnongx aj, gux maengx Zaeuj raeuz Yeysuz Jizduz, goj maengx Minghkoan dij Sen nwh raeuz naeh saengq gaenqsu, gaenqsu yauq caqsiq daj gux zaemh vanz dij Sen saeh gux oaj, <sup>31</sup>vanz dij Sen jeuq gux ni dawj mungz dij goanz ndaw mbanj Yaeuhdaq sowh puj mboq sinq Zaeuj naeh, vanz dij Sen hawj dij goanz Yezluqsaxlaengx chaenh sowh puj sinq Zaeuj naeh venq deq bih jenz gux tw mwz naeh. <sup>32</sup>Vanz dij Sen hawj gux bae zawj su baenz, hawj gux bae zawsu faengz nyauznyauz, hawj gux daj gaenqsu zaemh ndaej cednoiq ixux. <sup>33</sup>Ngwz dij Sen laux hawj dij goanz yuqvangq naeh daj gaenqsu daengzle zaemh yuq. *Azmaenh!*

## Bauxloah Cham Sowh Puj Caew

### Cinq Naeh Yuqndae Mbaeuq

**16** <sup>1</sup>Gux haxdoq su, bihnongx nyingz raeuz Faezbix zawh goanz ux maengx ndaej, dix yuq aen zauqhoiq ndaw Jenzgowhlix chaenh naeh kvej, <sup>2</sup>dix mwz taeng zawj su zwzrawz, su yauq hoakzaq doiq bihnongx raeuz goanz ndai naeh doiq dix, dix miz gaeng baenz hawj su saeh, gaenqsu zoq saeh dix. Unj, dix ndaej saeh goanz lai taeuq, goj ndaej saeh gux. <sup>3</sup>Gaenqsu

how gux cham Bowhjizlaz daj po dix Yaqjizlaz, cham paenqdix yuqndae mbaeuq. Paenqdix zawh daj gux zaemh hoak najgaengx Jizduz Yeysuz. <sup>4</sup>Paenqdix cholaeng aen mingh gux, daengz aen mingh hoakri naengz mboq aeu saw. Mboq zawh gaj gux mbaiq paenqdix, sowh zauqhoiq mboq zawh puj Yaeuhtaiq naeh aen rawz goj mbaiq paenqdix. <sup>5</sup>Goj how gux cham dij goanz zauqhoiq yuq rownz paenqdix naeh, cham paenqdix yuqndae mbaeuq. How gux cham Yixbaiqnihtux goanz daj gux dungzndae taeuq naeh, cham dix yuqndae mbaeuq. Yuq ndaw mbanj Yaqciqyaq naeh dix zawh goanz sinq Jizduz goanz sinq daekgoanq naeh. <sup>6</sup>Goj cham Maxliqyaq yuqndae mbaeuq. Dix ndaej kvej su chaekndae taeuq. <sup>7</sup>Goj cham bihnongx gux Anzdoznihgux daj Yaeuhnihyaq,<sup>g</sup> cham paenqdix yuqndae mbaeuq. Paenqdix ndaej daj gux zaemh mwz ndaw lauz kaeng, dij goanz zawxkauq Yeysuz lezndaejqix paenqdix, paenqdix naengz sinq Jizduz daekgoanq gux. <sup>8</sup>Goj cham Anqboahliq goanz zaemh sinq Zaeuj, yaq daj gux dungzndae taeuq naeh, cham dix yuqndae mbaeuq. <sup>9</sup>Goj cham Exbaznuq, goanz naeh ndaej daj gux zaemh hoak najgaengx Jizduz, cham Seqdaqgux, goanz naeh daj gux dungzndae taeuq, cham song goanz naeh yuqndae mbaeuq. <sup>10</sup>Goj cham Yaqbixliq goanz zoah daeg goj naengz in ndaej vwnx naeh, cham dix yuqndae mbaeuq. Cham rownz Yaqliqdozbuq, cham paenqdix yuqndae mbaeuq. <sup>11</sup>Cham bihnongx gux Cizloahrenz, cham dix yuqndae mbaeuq. Cham rownz Nahqihsuq sowh puj sinq Zaeuj naeh, cham paenqdix yuqndae mbaeuq. <sup>12</sup>Cham Tuxfaeznah

<sup>g</sup>16:7 Yaeuhnihyaq zawh puj nyingz.

daj Tuxfuqsax, song goanz nyingz naeh caqsiq hoak najgaengx Zaeuj taeuq, cham doiqdix yuqndae mbaeuq. Cham Pihcih yuqndae mbaeuq, goanz naeh daj gux dungzndae taeuq, dix caqsiq hoak najgaengx Zaeuj. <sup>13</sup> Goj cham Nuxfuh goanz Zaeuj lowg naeh daj meh dix, cham meh lug zaiz naeh yuqndae mbaeuq. Meh dix nwh gux daj meh ndiang gux nwh gux dungzlumj. <sup>14</sup> Goj cham Yaqcunqqihtux, Fuhlowhganx, Howhmix, Bahloahbaz, Howhmax, daj paenq bihnongx daj paenqdix zaemh yuq naeh, cham paenqdix yuqndae mbaeuq. <sup>15</sup> Goj cham Faezloahloahgux daj Yaeuhliqyaq, Nihliqyaq daj nongx nyingz dix daj Azlinhbaz daj paenq sinq Zaeuj, paenq daj paenqdix zaemh yuq naeh, cham paenqdix yuqndae mbaeuq. <sup>16</sup> Gaenqsu yauq hoakzaq dij goanz ndaw rownz dungzcham naeh dungzcham oaj.<sup>h</sup> Daengzle dij goanz zauqhoiq Jizduz cham su yuqndae mbaeuq.

<sup>17</sup> Daengzle bihnongx aj, sowh puj rux hawj su dungzbyaeg, hawj su faedlaemx, hawj su mboq hoakzaq sowh gaenq su ndaej biak naeh, gaenqsu caqsiq hem paenqdix, ni paenqdix naeuz gvae ux. <sup>18</sup> Sowh goanz naeh mboq kvej Zaeuj raeuz Jizduz, hoak gaeng goj zawh tuh gaj sowh gaenq paenqdix ceu naeh, aeu kauq yawz coak puj sw. <sup>19</sup> Dij goanz ijrawz goj ruxnyinz gaenqsu biak kauq dij Sen taeuq, baenzzaqnaeh gux how su faengz. Gaj gux ngwz su doiq gaenq ndae hoak goanz lingj, doiq gaenqndoag

hoak goanz uaj. <sup>20</sup> Dij Sen hawj dij goanz yuqvangq naeh zaekgaj nditnduj Sazdanz yuq dej din su yah. Ngwz Zaeuj raeuz Yeysuz Jizduz gumx su.

<sup>21</sup> Tihmoaxtaiq goanz daj gux zaemh hoak najgaengx dij Sen naeh, daj bihnongx gux Luqchaeuh, Yeysaenz, Soaxcizbazdowh cham su yuqndae mbaeuq. <sup>22</sup> Gux Dowhtih, goanz saeh Bauxloah laiz fung cing naeh, gux yuq ndaw Zaeuj cham su yuqndae mbaeuq. <sup>23</sup> Gaizyaeuh, goanz hawj gux Bauxloah yuq rownz dix ndowj, goj aeu rownz dix hoak dih hawj dij goanz zauqhoiq maz zaemh yuq naeh, dix goj cham su yuqndae mbaeuq. Yixlazduz laux saeq gaem jenz chaenh naeh daj Kohtux goanz bihnongx raeuz naeh cham su yuqndae mbaeuq. <sup>24</sup> <sup>i</sup>

<sup>25</sup> Biangz dij Sen, dix rux aeu sowh kauqfaengz gux koanx naeh, hawj gaenqsu kaem'zaw daeq ka loh dix mwznaj. Sowh kauqfaengz naeh zawh laemh Yeysuz Jizduz, zawh hawj dij goanz ruxndeq sowh gaenq zwzndowj mboq ruxndeq naeh. <sup>26</sup> Sowh gaenq naeh haeuz laiz nyaengx ndaw sw puj zawxkauq dij Sen hawj dij goanz ruxndeq, yaq laux Sen miz daengznauq naeh goj haeuz yaix daengz dij goanz dawjfax, hawj paenqdix biak Jizduz bae hoak. <sup>27</sup> Dij Sen gaenqraeuz miz aen gvai mboq miz gawz ndeu dix, ngwz daengzle cho'mbaiq Yeysuz Jizduz leztaen najta dix, taengdiak daengznauq. Azmaenh.

<sup>h</sup>16:16 Inxnaeh bwnz aeu kauq Cizlah laiz naeh hoakzaqnaeh hax: *Gaenqsu hoak dij goanz dij Sen dungzzup*. Zwz naeh dih paenqdix dungzbownh bihnongx dungzmex dungzzup, zawh hax paenqdix dungzndae taeuq.

<sup>i</sup>16:24 Mbangj bwnz miz gaemz naeh: *Ngwz Zaeuj raeuz Yeysuz Jizduz gumx gaenqsu. Azmaenh.*